

KA KOT PULE KHASI

KLASS IV

*Approved as Text Book for Khasi
Vernacular by the Government.*



Published by :
Christian Communication Deptt.
THE KHASI JAINTIA PRESBYTERIAN SYNOD
K J. Presbyterian Synod Church House,
Mawkhar, Shillong

2001

SCHOOL SECTION

KA KOT PULE KHASI

CLASS IV

*State Central Library
Government of Meghalaya
Shillong*

*Approved as Text Book for Khasi Vernacular
by the Government*

Revised by
Mrs. T. Lyngdoh

Published by -
**Christian Communication Deptt.
THE KHASI JAINTIA PRESBYTERIAN SYNOD
K.J. Presbyterian Synod Church House,
MAWKHAR, SHILLONG.**

KI JINGKHUNG

LXN		SLA
I.	Ka Jingiasiatthong ki Sohra bad ki Mawsmi (Rev. T. Rodborne, B.A., B.D.)	1-6
II.	Ngim dei ban tieng ia ki jingeh (Rev. John Roberts, D.D.) 6-8
III.	KOLUM KHASI (Mr. M.E.J. Jeengaphs) 8-10
IV.	Ka Jingstad u Solomon ha ri-Shin 10-12
V.	WANBUD KA KONG (Rev. T. Rodborne, B.A., B.D.) 12-14
VI.	U Dr. Rajendra Prasad (Mr. S.H. Syiemlieh) 14-18
VII.	Men Ym Tuh (Rev. John Roberts, D.D.) 18-22
VIII.	U SLAPBA PYNTNGEN (Miss M. Khongwir, B.A.)	... 22-24
IX.	Burom ia ki Tymmen (Mr. Myngngor Singh) 25-27
X.	I Sati Rupa 27-30
XI.	KANOHSNGI 31-32
XII.	Ka Ilektrik (Mr. F.M. Pugh, M.A.) 33-36
XIII.	MEI, PA, KYNMAW IA NGA 36-37
XIV.	Ka Rani Ahalya Bae (Mr. F.M. Pugh, M.A.) 37-40
XV.	Ka Beh Khiat (Mr. F.M. Pugh, M.A.) 40-44
XVI.	KA JINGIAIKYNJOH (Mr. F.M. Pugh, M.A.) 45
XVII.	U Liar Sirdar (Rev. T. Rodborne, B.A., B.D.) 46-51
XVIII.	Ka Rangli bad la i khun	... 52-61
XIX.	Ki Shrieh bad ki Sim 62-63

XX.	KA SYNRAI	64
XXI.	U Tharai bad u Buhteng	65-69
XXII.	Ka Beh Dngiem (Mr. F.M. Pugh, M.A.)	...	70-71
XXIII.	I Miss Florence Nightingale (Rev. T. Rodborne, B.A., B.D.)	72-77
XXIV.	U Kyllang bad u Symper (Rev. T. Rodborne, B.A., B.D.)	77-82
XXV.	KA JINGWAN KA PYREM	82-83
XXVI.	Ka Pukni, ka Miaw bad ka Sniang (Rev. John Roberts, D.D.)	...	83-85
XXVII.	Ki Puriskam Lushai (Mr. F.M. Pugh, M.A.)	..	85-87
XXVIII.	KA JINGSUMAR SUKHER U BLEI IA NGI (Mr. F.M. Pugh, M.A.)	88-89
XXIX.	Ka Synduk Ksiar (Mr. L. Tongper)	..	89-94
XXX.	Ka Sultana Rezia (Mr. F.M. Pugh, M.A.)	94-97
XXXI.	KA JINGPYNJAH THNGAN (Mr. F.M. Pugh, M.A.)	...	97-98
XXXII.	U Nong-Samaria uba bha (Baibl)	..	99-100
XXXIII.	U Sivaji (Rev. T. Rodborne, B.A., B.D.)	..	100-105
XXXIV.	U Ksew bad ki Dkhiw nt (Mr. F.M. Pugh, M A)	..	106-110
XXXV.	Ka Ktien Khasi (Ki Verb) (Rev. John Roberts, D.D.)		110-112
XXXVI.	Ka Ktien Khasi (Ki Adjective) (Rev. John Roberts, D.D.)	..	112-114
XXXVII.	U Budha (Rev T Rodborne, B.A., B D)	114-121
XXXV "	Ka Jingtatrei Lang (Rev. T. Rodborne, B.A. B D)		121-125

LYNNONG I

KA JINGIASIATTHONG HAPDENG KI SOHRA BAD KI MAWSMAI



Ka jingiasiatthong ka long ka jingialehkai tamasa
jong ngi ki Khasi bad ym don kano kano kawei pat ka
jaitbynriew ha ka pyrtnei ka ban iasiatthong kumba
ngi ju leh ma ngi.

Ka don kawei ka jingiasiatthong kaba'la kham hyndai, ba la ialeh hapdeng ki Sohra bad ki Mawsmmai, kaba la iathuhkhana pateng namar ba ka long kaba donnam bad kaba kham phylla. Kane harum ka long ka khana lyngkot shaphang kata.

Kata ka jingiasiatthong hapdeng ki Sohra bad ki Mawsmmai ka la neh slem eh namar ka jingiajop ka long mar mar kyliang. Ha badei badei la jop ki Sohra bad ha badei badei pat la jop ki Mawsmmai. La ong ba shisien ki Mawsmmai ki la jop lynter arwat bad lada ki Mawsmmai kin jop sa shisien te ki Sohra ki la rem duh artad. Ha kata ka jingiahynduh kaba lai, ka jingialeh ka la long kaba shitrhem bad kaba khraw katta katta. Ki Mawsmmai ki la khreh bha bad ki la pyndonkam lut baroh ki buit ki lad ban jop ia ki Sohra sa shisien khatduh iawai, bad ki Sohra ruh ki la shut bha la ki reng bad iakyrshan iaiap, lym kumta la kheiñ ka burom.

Ha kata ka jingiahynduh kaba lai, kumno-re kumno ki Sohra ki ioh daw bad ki la jop ia ki Mawsmmai bad kata ruh arsien pynbud. La ieng ka daw u Sohra bad la kyih sa u Mawsmmai. Hangta la ieng ka iathuhkhana ha iing ha sem, ha iew ha hat, ha lynti ha syngkien bad kat haba don ka iakren ka iakhana, baroh bad rangbah bad samla, bad wat ki

kynthei ruh, khamtam ha Sohra bad Mawmluh, ki la iakren tang shaphang kata ka jingiasiatthong.

Ha kata ka sien kaba lai ban rai ia ka rem ka jop hapteng u Mawsmi bad u Sohra; la mih u paidbah shynrang bad kynthei u bymtip shuh. La ong ba baroh ha Sohra, *Dukan, Mawmluh bad Mawsmi ym don ba shong iing shuh. Wat ki kynthei ruh ki la iatuid paidbah ban kitbok ia ki rangbah, ki da kup ki da sem, ki da riam bha ki da riam miat ryngkat bad ki jingdeng ksiar jingdeng rupa. Ka jingmih paidbah kaba kat kata, ki ong, ym pat ju don ha Ri Khasi Ka jingshongshit ka long kaba khraw katta katta ba wat u Syiem bad ka mahadei ki da hap hiar hi khru sha madan

Haba la iashong mar la ka liang bad la sdang ka jingiasiat, la sngap u paidbah jar. Uwei uwei u nongsiat saw saw khnam, bad kumta u khnam u la siaw ha suiñ ba pyliat ki rangbah ryntieh. La ialeh baroh shisngi hynrei mar mar iakhaiñ Teng teng la lam u Sohra bad teng teng la lam u Mawsmi ha ka jingtam khnam bad kumta ka la iaid haduh ba la jan noh ka sngi. Ha ka sien kaba khatduh, ki Mawsmi ki la tam haduh lai khnam bad hangta ka jingshad bad jingkyrdem ki Mawsmi ka bym tip shuh haduh ban da them ka khyndew bad tдем hi thui. Ki Sohra pat ki la shaiong bad shohbieit, bad la dum ka

*Dukan — Ka kyntoit shnong

pyrthei ka mariang ia ki. Ki kynthei bapli kiba iashong halor maw kim nang iakren shuh bad ban iaphai khmat paralok ruh ym man ia long shuh. Ki la ring pynnoh bad pynjrong la ki tapmoh khlieh kumba ia iam da kaba sngewrem. Ki 'tien kynnoh, ki 'tien kop bad ki 'tien pharshi ki Mawsmmai ia ki Sohra ki tuid kumba shu theh na ka ktang. Ka liang ki Sohra te ki la kynjah hi jar.

Hamar kata ka por, ka jingshad kmen u Mawsmmai ka bymtip shuh, la mih uwei u rangbah Sohra bad u la pyrta ia ki Mawsmmai u da ong, "Ko.ki Mawsmmai wat sarong ho! dang don sa uwei." Bad mar kumta hi la mih u Ram Singh Syiem na ka sem shongkai uba long u nongsiat khnam uba pawnam bha hi ha ki por shwa ba un long syiem. Tang shu iohi ia u, ka liang Sohra ka la syaid hi ur bad la khie im buk bad ki kynthei kiba la dem la ki khlieh ki la ia pynjrong la ki ryndang bad la kiew saw ka khmat jong ki. Haba ki Mawsmmai ki la iohi ia u Syiem ki la kham thanda ka sur phawar bad la kham khia ki kjat shad jong ki.

Tang shu ktah u Syiem ia ka ryntieh bad ki khnam, ki Sohra ki la ieng bad ki la pynkhih ia ki met. U tang shu pyllait shi khnam thrait, ha ka sohpdung sbak shaid la risa bad shynrang bad kynthei. Hangta la kyndeh ka mynsiem baroh

arliang bad Sohra bad Mawsmmai. Ki nongphawar ki Mawsmmai ki la ia peit seh paralok, kim nang ialeh ei ei shuh. Sa shi khnam u Syiem u la pyllait bad uta ruh sbak ha ka sohpdung. Hangta te ka jingshad u Sohra ka bym don jaka shuh. Ym don shuh mano mano ruh ba khlem kynting la ki kjat. U la pyllait sa uwei bad uta ruh sbak ha ka sohpdung bad joit ieng ki rangbah bad buk ki khieh ka shad. Nangta u Syiem u la pyllait sa uwei bad uta ruh sbak ha ka sohpdung bad kumta la tam khnam u Sohra uwei Hangta lei lei shuh, la khieh u Sohra bad la tдем ka khyndew, bad ka suiñ ruh ka la shlei da kř jingphawar jong ki Ki kynthei na khlieh ki maw ki la klet ialade. Ki la ryngkoh ha madan, ki la joit la ki jaiñ kup, ki bat ia ki ha kti bad ki la iakhalek bad ki rangbah Ym don iwei ruh bad shynrang bad kynthei bad tymmen bad khynnah na ki paid u Sohra kiba khlem shad Ki kynthei ki bym ju tip ka phawar iasiat mynno mynno ruh kim lah shuh ban kun bad ki la iaphawar ryngkat bad ki rangbah

Ha kata ka sngi ka jingphawar iasiat kam long shuh ia ki Mawsmmai ban pynrem ia ki, namar ka jingkmien u paidbah ka la phai sha u Syiem. Ka sur phawar jong ki ka la long noh — “Tang uwei uba lah! Tang uwei uba lah! Tang uwei uba lah!

Ko hep, ha ka pyrtnei, tang uwei uba lah!”

Ki Jingkylli:

1. (a) *Kaei ka jingiasiatthong?*

(b) *Balei ba ka jingiasiatthong hapdeng u Sohra bad u Mawsmal ka la neh slem bha?*

2. *Mano ba la jop ha ka sien kaba khatduh jong ka jingiasiatthong? Mano ba la pynjop ia ki?*

3. *Mano ba la iapyrta, "Tang uwei uba lah! Tang uwei uba lah! Tang uwei uba lah!" Kane ka jingiapyrta ka thew iapo?*

.....

LYNNONG II

NGIM DEI BAN TIENG IA KI JINGEH

Haba kyntu ia ki rangbah bad ia ki khynnah ban pule kot ba kin dup nang, ki ong "Ngim lah ba ngi duk eh." Hynrei nga ong ba ym donkam ia uno uno ruh ban sah bieit tang namar ba duk. Don bun spah ki briew kiba duk eh kiba la stad shibun, bad ki la kiew sha ka burom kaba khraw namar ba ki la bein ia ki jingeh bad ki diengpyngkiang baroh. U Sahep Alexander Murray, haba u dang khynnah, u la long uba duk eh. U kpa jong u u la long u nongaplangbrot, bad um don bor ban phah skul ia la u khun. Hynrei une u khun u la

hikai thoh da ka dieng tyllaw halor ka lyntang U kpa jong u, u la don tang kawei ka kot ha la iing bad kata ka long ka kot Tikir. Te ia kata ka kot la ñiewkor haduh ba kim ju pynmih ban pule lait tang ha ka sngi U Blei, ioh ka jot noh. Pynban une u khynnah uba duk u la long uwei na kiba stad tam ha ri Bilat Kat kane ka jingkyrduh phim ju shem ha ri Khasi, kumta wat ong shuh ba phim lah namar ba duk Ia kaba lah phi lah eh lada phi mon

Sngap sa ia kane pat U Sahep William Cobett u la long u shipai uba ioh bainong tang shi suka shisngi Um shym don pisa ban thied mombati lane umphniang ban thang sharak ban pule mynmiet, bad tang ha badei badei u ioh pule hajan ding. Haba u kwah ban thied khulom lane sia lane kot sada, u donkam ban shah jingit baroh shisngi Ha iing ryngkat bad u ki don hynriew ngut ki para pyrton jong u kiba thala suda, kiba iakren kai, rkhie, siaw, rwai lane iakajia ha la ka sngi. Nalor la ka bam, u ioh tang shi anna shi taiew Ha kawei ka sngi u la ioh, da kaba eh, ban kynshew shi peisa ban thied 'khapiah kum lashai, hynrei haba u la leit wad mynstep ia kata ka peisa ka la jah noh Lehse phi phim suidñiew ei ei ia tang shi peisa, une uba duk u la tap ia la ka khlieh da ka jaiñ kup thiah bad u la iam kumba iam i khyllung. Pynban une u Cobett

ba duk u la kylla long uba stad eh nalog ba u long uba duk, u
la rangbah ruh haba u la sdang ban hikai.

Ko khynnah, ko rangbah to pyrkhath ia ka jinglong une
Lada une u la man stad la u duk katta, bad ba u la rangbah
ruh artad haba u la sdang ban hikai, hato balei phi phim lah?
Nga ong ba ym don uwei uba duk ha ka ri Khasi baroh u bym
lah ban long uba stad lada u mon ban ialeh

Ki Jingkylli

*1. Ka jingduk ka lah ne em ban khang lada ia u brieu
ban long uba stad?*

2. Phi tip au shaphang u Alexander Murray?

*3. Iathuhkhana lyngkot shaphang u Sahep William
Cobett?*

.....

LYNNONG III

KO LUM KHASI

1. Ko lum Khasi ba sngewpyngngad
Ba ngan iaidkai nga sngewtynnad,
Kat pha ngam shem shuh ha pyrthei,
Ba pynsngewhun ia nga marwei



- 2 Ah! Lum Khasi, pyngngad hür hir,
 Ki wah jong pha ba sngur khilir khilir,
 Bad lyiur bad tlang ki mih, kim ryngad
 Ki lum jong pha ki iai pyngngad
- 3 Ko lum Khasi ba pyngngad sah,
 Ban ioh iaidkai baroh ki kwah,
 Ki er pyngngad, ki um bashngiam,
 Ki beh, ki mih, na lum jyrngam

4. Haba na kliar ki lum nga shong,
 Ngam lah khlem nam, khlem sngewsarong
 Ah! ban da don thapniang pukni
 Ngan her sawdong ki lum Khasi.

Jingkylli:

*Thoh na la ka jingkyimaw ia baroh sawtylli ki dkhot
 na ka jingrwai "Ko Lum Khasi" da kynmaw de ban buh
 ia ki dak sangeh (punctuation marks) kiba dei.*

.....

LYNNONG IV

KA JINGSTAD U SOLOMON HA RI SHIN

La wallam ia ki kynthai arngut ha khmat u Manderin ne u Nongbishar ha Shin. Baroh arngut ki iadawa ia iwei i khunlung, kawei da ka jingkreng kaba tyngheh ka ong ba u long u khun jong ka, kawei pat da ka jingbitar mynsiem ka ong ba ita i khunlung iba la wallam ha khmat i dei i jong ka, bad ba kata kawei ka kynthai ka lamler. U Nongbishar u la thapbaiong ngaiñ bad um tip kumno ban leh. U la leit sha ung ban iapyrkhat

bad ka lok jong u kaba long ka briew kaba stad shibun. Ka lok jong u ka la ong ia u, "To da ap san minit ba ngan pyrkhat ia kane ka kam." Ynda la kut kata ka por ka la ong, "Khie leit ong ia u shakri ba un leit kem kawei ka dohkha kaba heh na wah bad ong ia u ba un wallam im ia ka ha nga." La leh kumba la ong. Ynda kumta ka lok ka la ong, "Wallam ia ita i khunlung hangne ha nga bad ong ia kita ki arngut ki kynthei ba kin nang sah ha kawei pat ka kamra." Ia kane ruh la leh kumba la bthah. Nangta ka lok u Manderin ka la hukum ban loit ia ki jaiñ ita i khunlung bad ban pynphong bha katba lah ia kita ki jaiñ ita i khunlung ha kata ka dohkha kaba heh. "To keiñ," ong kata ka lok u Manderin, "leit rah kato ka dohkha harud wah bad bret ia ka hapoh wah haba baroh arngut kita ki kynthei ki don ha khnat." U shakri u la leh kumba la hukum ia u da ka kynrad jong u. Ka dohkha ka la kyrthat hapoh um ba ka ialeh ban lait na ki jingkhum ki jaiñ ki nep. Shisyndon kawei na kita ki kynthei da kaba lynñiar ka la noh pum ha wah khnang ban pynmih na kaba ngam jyilop ia ita iba ka la tharai ba dei i khun jong ka. Ka lok u Manderin nangta ka la ong, "Katei dei ka kmie i khunlung, ym don jingartatien shaphang kata."

La kyntiew ia ka na ka um bad la ai ia i khunlung ha ka. U Manderin u la mynjur, bad mynta u la ngeit ba ka lok jong u ka long kaba stad tam ia baroh ki briew ha ri Shin. Kata

kawei ka kynthei ka la phet iap. La ai pli ia ita i khunlung, da ki jaiñ kiba kham bha ban ia kita ki jong i kiba la pynphong ha ka dohkha.

Jingkylli:

1. Balei la wallam ia ki kynthei arngut ha u Manderin?

2. Kumno ka lok u Manderin ka la ong ia la u lok ban leh?

3. U Manderin u ong kumno shaphang ka lok jong u?

.....

LYNNONG V

WAN BUD KA KONG!

1. “Wan bud ka Kong!” Mano kumta?
Nga dei ha shnong, ne ha lyngkha?
Nga shu phohsniew? Nga khie ruma?
Em phi, ka briew, nga sngew shisha.
2. “Wan bud ka Kong!” Shano kumta?
Ka dei sha jrong? Phi khot ia nga?
Ko kong jong nga? Phi dei sha kum?
Phi don shata, ne, phi sharum?

- 3 “Wan bud ka Kong!” Phi phet shano?
 Ap lem seh kong Ngan juh kumno,
 Naduh phi mih, kynjah ka shnong
 Tang jingsngewsih ha iing ban shong?
- 4 “Wan bud ka Kong!” Ko Kong ani!
 Mynsiem shu rong shu tang ia phi,
 Nga iin kynmaw bad miet bad sngi,
 Ummat shu jaw, lynter ka sngi
- 5 “Wan bud ka Kong!” Ale ko Kong!
 Ha iing la jong, ngam sngew juh shong,
 Kat phi ialam, katba kynduh,
 Bad phi ngan ngam, la roh la duh
- 6 “Wan bud ka Kong!” Kumta, balei?
 Ka rngai sha jrong? Nga i, sha ei?
 Ka sim du pleng! Ani waw mei!
 I Kong ha bneng, nga ha pyrthei

.....

Note — ‘Wan bud ka Kong’ — Kane ka long ka sim Khapsnem kaba don ha ri War Ka sur pah jong ka ka long — /m.r.m/d (Wan bud ka Kong) Niar eh ba kan don ha lum Khasi kumba ka Kak-ku ka nuar eh ba kan hiar sha ri War Kane ka Poetry kam mih na ka jingthaw iathuhkhana ki Khasi shaphang kane ka sim ban iadei bad ka jingmut “Mai pap ka Kong” ne “Niat pap ka Kong” ne “Wan bud ka Kong” Ka sur sngewsynci kane ka sim khamtam ha ka premmiet bad teng

teng ha ka por shiteng synñia bad por kynih syiar, ka ring ia ka jingmut uno uno uba sngapthuh, sha ka pyrthei thymmai kaba khambha kaba sha lyndet, ba kito kiba la leit noh ki la ioh shong.

Jingkylli:

1. *Thoh na la ka jingkyinmaw ia ka jingrwai "Wan bud ka Kong."*

2. *Kane ka jingrwai ka kren shaphang jongno?*

.....

LYNNONG VI

U DR. RAJENDRA PRASAD

Bun bun na ngi ki khynnah, ngi la ju iohsngew ia ka kyrteng u Gandhi bad u Nehru. Kine ki long ki briew ba pawnam tam jong ka ri India Khyndiat eh kiba tip, ne wat kiba la iohsngew shaphang u Dr. Rajendra Prasad

Mynta ngin iathuhkhana katto katne shaphang une uwei u riewkhraw ka Ri India. U dei ma u uba long u President, uba nyngkong lane u nongsynshar uba ha khlieh eh jong ka Ri India katba ha ka por ba u Jawaharlal Pandit Nehru u long u Myntri Rangbah.

La kha ia u Rajendra Prasad ha ka 3 tarik, Nohprah 1884 ha ka nongrit Teiradai, ha ka District Saran jong ka jylla Bihar U long u khun khatduh ha la ka iing Ki kmie ki kpa jong u ki long kiba duk, bad bun bun snem ki la im ka jingim kaba shitom kaba eh Ha ki snem kiba kham hadien ki la im kham suk jingmut khyndiat, da ka jingtrei minot bad ka jingtrei shitom u kñi jong u Rajendra.



Uta u kñi jong u u la kwah ia la u pyrsa ba un long uba tyngshaiñ ka nam ha ka ri bad ha ka pyrthei .Ka la urlong kumta shisha kumba ngin sa iohi harum

Ha kaba nyingkong eh, u Rajendra u la iohsngew na la ka kmie, ki jingiathuhkhana shaphang ki artylli ki kot niam ki Hindu, kiba kyrteng ka Ramayana bad ka Mahabharata. U la sdang leit skul hala shnong da kaba pule ha ki artylli ki ktien, ka ktien Persian bad ka ktien Hindi. Ynda la dep ka skul rit ula leit shong skul ha ka shnong Shapra ha kaba u la hikai ia ka ktien Phareng, bad u la ioh shibun ki Prais namar ki jingjop jong u, bad don ruh ka jinglong kaba minot, kaba sngewrit bad kaba beit Ha kaba ialeh ia ka Matrik u la ieng nyingkong ha ka Skul Bah (University) Kolkatta baroh kawei Haba u la pule kollej (College) u la ieng borabor ha khlieh duh, la jan ha man ki Eksamin. Haba u la long grajued (graduate) u la leit phai sha la ka ri Bihar, bad u la hikai bad iarap ruh ia ki khynnah skul kylleng ka ri kumno ba kin long ki nongtrei jong ka Ri India lashai lashishgi.

Ynda hadien, haba la khieh buk ki riew ieit ri ka Ri India, hapoh ka jingialam u Mahatma Gandhi, ban ioh la ka jingsynshar laitluid na ka kti ki Phareng, u la noh ban iasoh lang bad ki. Ha ka snem mynba ka jylla Bihar ka shah jynjar khaat namar ka jingkhynñiuh jumai kaba jur, bad nangta ban sa ka jingshlei um kaba sngewshyrkhei, u Rajendra Prasad u la aiti ia lade khlem kheñ ia ki jingshitom la ka jong ka met,

ban ioh iarap ia kiba shem jynjar shem lanot. Naduh kata ka por la tip ia u da ka ri jong u baroh kawei. U la aiti lut ia lade na ka bynta ka jingbha bad ka jinglaitluid jong ka ri, bad u la donkam ban shah set patok ha ka Sorkar Phareng bad shah ruh shibun kiwei pat ki jingshitom

Haba ka Ri India ka la ioh ia ka jinglaitluid na ka kti ki Phareng, u Rajendra Prasad u la ioh ban long u President jong ka Ka jingminot jong u, ka jingieit ri jong u, ka jingkloi jong u ban shakri ia la ki parabriew, da kaba shah shitom ruh na ka bynta jong Ki kine baroh ki kdew ba u long uba bit eh ban phong ia ka pansngiat ka Ri India, kum u nongsynshar uba ha khlieh duh jong ka

U Rajendra Prasad u long u briew uba jemnud bad uba lehril ha ka shong ka sah, ka kup ka sem, ka bam ka dih Borabor wat haba u shong ha ka khet kaba ha khlieh tam jong ka Ri India, u ju thir ksai man ka sngi kumba shikynta shisngi, bad u ju thairi hi ia la ki jain kiba u kup Katba u nangtrei ia kine, u nang bthah ia u nongthoh jong u ban thoh ia ki kam hima sima.

U Rajendra Prasad u long uwei hapdeng ki briew kiba khraw tam jong'ka ri, hynrei u ieit ia ki khynnah rit, u sngewbha eh ban ialehkai bad ki ksiew rit haba

ioh por. U ieit ruh ia kiba duk, kiba shitom, bad khamtam
ia ki nongphet shnong (refugee) kiba ialang khamtam ha
Delhi bad ha Kolkatta. Kane ka jinglong jong u ka ring
ia ka dohnud u paidbah ka ri baroh, ban ieit bad
burom ia u.

Ki Jingkyllh

1. *Uei u President banyngkong jong ka Ri India?
Mynno la kha ia u?*
2. *Thoh katba phi tip shaphang u Rajendra Prasad.*

.....

LYNNONG VII

MEN YM TUH

Phi dei ban hikai, ban long kiba hok ha kiei kiei baroh,
ban leh burom, ban leh hok ia la ki para ki hynmen, kumjuh ia
la ki lok. Phin sngewthuh bha, ba ka jong nga kam dei ka
jong phi, kumjuh kumba ka jong phi kam dei ka jong nga

Ka hukum U Blei ka ong, "Men ym tuh" la ka long
kaba kumno kumno, ka latom ñiuma, wat u pin u bym
dei u jong phi, phim dei ban shim. Kaba tuh ia ka kot lane ka

tari, ka long pop kumjuh kum kaba tuh pisa. Ka long pop ban tuh soh, tuh syntiew na kper ki briew, kumba ka long pop ban tuh jaiñ, tuh khaw na ñing ki briew.

Kano kano kaba phi shim, haba um tip u trai, ka long kaba tuh La uta u trai u ñiewkor ne um ñiewkor, la u tip ne um tip ba jah ka mar jong u, ka jingnsiew ka kam ka sah kumjuh Lada u trai um shym ai jingbit ba phin shim ia kita ki mar, ka long kaba tuh.

La don uwei u sahep, uba leit jingleit sha ri Scotland, te haba un sa poi sha shnong Edinburgh, la wan uwei u khynnah uba duk ha u ban khrong peisa. Te u la ong ha u, ba um don peisa — tang ki tyngka shipiah; te uta u khynnah u la tyrwa ban leit wad peisa ban ai peiñ.

Hynrei uta u sahep u la shu ai ei ia kata ka shipiah. Uta u khynnah u tharai ba u ai ia kata ka shipiah ba un leit iapeiñ, kumta u la mareh sha ki nongiapeiñ. Te haba u la wan pat sha ka jaka, uta u sahep um don shuh; kumta uta u khynnah u la ap bun sngi ha kata hi ka jaka. Ynda la katto katne, u sahep u la lap ba iaid pat nangta; te uta u khynnah u tang shu iohi ia u, u la leit kren ha u, u ong, “Heh! Kine ki peisa jong phi; nga la sumar bha ia ki.” Hangta u la ñiew bha ia kita

ki peisa ha ka kti uta u sahep. Te uta u sahep u la sngewtynnad ia ka jinglehhok jong u khynnah, haduh ba u la buh skul ia u, bad u la ong ba un sumar ia u ynda u la dep na skul. Ia une u khynnah la hikai da ka kmie jong u ba, la kumno kumno, yn ym shim ei ei kaba dei jong kiwei pat.

Uwei u nongkhairi u la leit jingleit sha ri Russia, te, ha kawei ka miet, u la leit sahmiel ha kawei ka iing uwei u briew uba duk. Ki iing ha kata ka jaka ki kham ñiar Mynstep haba u la sdang leit la ka jingleit, u la shem ba u la jah noh u saipan uba don kumba shispah ki mohor ksiar.

Te u khun uta u trai iing u la shem ia uta u saipan haba u la leit beh mrad; hynrei um shym tam ei, u la leit iathuh pynban ha la u kpa. U kpa ruh um treh ban ktah ia u; kumta u ong ia la u khun, ba un tap da ki sla dieng, bad ban iehnoh ia u hangta, haduh ban da shem da u trai.

Ynda katto katne bnai, uta u nongkhairi u la wan phai pat, bad u la thiah miet ha kajuha ka iing; hynrei uta u trai um ithuh ia u. Haba ki iakren paralok mynmiet, uta u nongkhairi u la ialap kai ia ka jingduh spah, mynba u iaid nangta mynshuwa. Uta u trai iing u la sngap bha ia kiei kiei baroh kiba uta u

nongkhaii u la iathuh ha u. Hadien kata u la ong, “U khun jong nga un kdew ia ka jaka ha phi, ha kaba u saipan jong phi u don. Ka kti jongno jongno kam shym ktah ia u, hynrei tang ka jong uta uba la lap ia u, khnang ba phin ioh ia la ka mar ba jah.” Ki ia leit ryngkat sha kata ka jaka, bad ki la shem shisha ia u saipan ba la jah, bad ki mohor ksiar baroh ki don hapoh; te uta u nongleit jingleit u la kmen shibun ba la ioh pat ia ta ka spah Te u la pyini ia la ka jingsngewnguh ia uta u briew, da kaba iarap ia u khun jong u, bad uta u khun, ynda la katto katne, u la leit shong ha ka shnong uta u nongkhaii

Lada ki briew baroh ki long kiba hok, ngin ym donkam ia ki dieng khang iing lane ki tala Haba phi iohi ia u nongapkwai, lane u nongapsoh, to ong, “Uta um long namar jong nga ” Haba phi iohsngew ia u paramarjan ba u khyrwait tala ia la ka iing, to ong, “Kata ka tala kam long namar jong nga.” To sngewhok, hok naduh khlieh haduh kjat Hangta te phi lah ban ieng beit, phin ym pyndem ia la ka khlieh, namar ba sheptieng ia u nongmudui

Don kawei ka jingleh bymhok ba ngi shait iohi hapdeng ki khynnah skul. Uwei u khynnah u bud na ka sleit, lane na ka kot u para khynnah. Kane kaba shukor ka long kaba tuh Ka jingthoh ha kata ka sleit, lane ha kata ka kot, ka long ka jong u trai; te, haba phi bud ia kata, phi tuh. Bad haba phi leit pyini

ia la ka sleit ha u nonghikai, haba phi shim pynban ia ka jingthoh na ka jong uwei pat, phi lamler. To ñiewbeiñ ia kaba kum kata ka kam. Long uba shisha ha kiei kiei baroh; bad to kiar sha jngai na ki lynti lamler, bad na ki lynti shukor baroh.

Ki Jingkylli:

1. *Balei ngi dei ban long kiba hok ha kiei kiei baroh?*
2. *Iathuhkhana lyngkot shaphang u sahep uba leit jingleit sha ri Scotland.*
3. *Kaei ka jingleh hymhok ba katto katne ki khynnah skul ki shait leh?*

.....

LYNNONG VIII

U SLAP BA PYNTNGEN

1. U brieve ha lyngkha,
 U syep, u pisa,
 Ka khyndew ka khluit,
 U mohkhiew u btuit.

2. Ki dieng ki kynjah,
 Ki sla ki samthiah;
 Tang ka sngi ha suiñ,
 Ka samrkhie rymmuiñ.



3. Ki masi ki blang,
 Ki sangeh bam phlang,
 Ki sim ki la jah,
 Ym don shuh ba pah.

4. Baroh ki ia ap,
 I'u slap ba un hap;
 Ha suiñ lah ban i,
 U lyoh iong u jngi.

5. Une u nang heh,
Ia ka sngi u beh;
Ngit ka bneng ka iong,
Ba khie ka eriong.

6. Na jngai u pyrthat,
U kyrhuh u kynad;
Ki sim ki phet iap,
Sha ki skum ki bniap.

7. U slap u sdang jaw;
Ki risa ki khlaw;
U briew u sngew im,
Ki mrad bad ki sim.

8. U ther u lapbah,
Ki shlei sa ki wah;
Ki jingthung jingtep,
Katto kin ym sep.

Jingkylly:

Thoh na la ki jingkyinmaw ia ka jingrwai "U slap ba pyntngen", da ai artad bad ki dak sangeh (punctuation marks kiba dei).

.....

LYNNONG IX

BUROM IA KI TYMMEN

Kane ka long ka akor ba stad, ka jinglong ki brieve ba la ioh jingshai — ka jinglong kaba kyntiew ia u brieve hi. Ki khynnah bad samla mynta kiba la ioh jinghikai tang kat ban pynsarong bieit ia ki, ki ju kren bein ia ki tymmen lane ia ki rangbah haba ki iohi ne iohsngew ba ki leh ei ei kaba kim tharai ba ka dei, lane haba ki lap ia ki jingduna jong ki, hynrei ka jinglongbrieve ba sian bad babha kam pynksan ia kata Ka Baibl ka ong, “To menieng ha khmat ka khlieh uba la phuhñuhlieh, bad to burom ia ka khmat u tymmen, la u long uba phi ithuh ne phim ithuh, uba phi iadei ne phim iadei ”

Ha kawei ka jingialeh tamasa ha Athens, ka shnong ha ri Greece, uwei u tymmen u la wan palat por bad um ioh jaka shuh ha ka jaka shong ba la buh khnang ia kiba kum ma u Bun na ki samla Athens, haba ki iohi ia kata, ki la ai dak sha u ba kin ai jaka ia u ha kaba ki shong, lada un wan Uta u tymmen u la phrung napdeng u paidbah, hynrei ynda u la poi ha kata ka jaka shong ba la pyni ia u, kita ki samla ki la leh

thamula pynban da kaba ki iashong pynkhapngiah jaka khnang pynban Kumta ka jingrkhie thamula ka la iaiaid sawdong ia ki ben ki nong-Athens baroh

Hynrei kum ha kita ki kam ju don ruh ki jaka ba la buh khnang ia ki nongwei Haba uta u briew uba bha u la leit da ka jinglehraiñ ba khraw sha ki jaka shong ba la buh khnang ia ki nong-Sparta, kita ki la ieng joit baroh shriak khlem shong shuh uwei ruh, bad da ka jingburom ba khraw ki la pdiang ia uta u tymmen hapdeng jong ki.

Ki trai shnong Athens, haba la ktah kyndit ia ki da kata ka akor ba bha jong ki Sparta, bad ba ki ioi la ka jingkhlemakor, ki la risa shar da ka jingiaroh, bad uta u tymmen u la pyrta jam, “Ki trai shnong Athens ki sngewthuh kaei kaba dei, hynrei ki nong Sparta ki leh ia kata.”

Ki riewtymmen ki la ioi ia ka sngi ba kha ia ngi, ia ka sngi ka jinglong khynnah jong ngi, ki la ju hikai ruh lehse ia ngi. Balei ngim dei ban shynraiñ ia ka khmat jong ki lane ban tyngkan la ka ktien na kaba kren-beiñ ne kren eh ia ki? Ban lah da ki khynnah ia u rangbah, kata ka long ka burom ki ‘riewbieit, ban rem tymmen ha khmat u samla, kata ruh kam long kaba sngewbha. Hynrei shaphang kane ruh don ka dak

jingkyrmen haba iohi ba don na kito kiba la ioh jinghikai ba
pyni ia ka rukom ba bha ha kaba burom ia ki `riewtymmen

Ki Jingkyll.

*1. Ka long ne em kaba dei ban ihei ne kien hei ia
ki tymmen? Baler?*

*2. Balgi uto u riewtymmen u la pyrtajani, "Ki trai
shnong Athens ki sngewthuh kaer kaba dei, hynrei ki
nong-Sparta ki leh ia kata?"*

.....

LYNNONG X

I SATI RUPA

La don, ha kawei ka por, uwei u briew uba stad bad ba
donburom shibun U la don iwei i khun kynthei, ia iba u la
kyrteng i Sara. I Sara i la sdang ban san bad la palat 10 snem
ka rta. Kumta u kpa u la pyrkhat ba ka la poi ka por ha kaba
u dei ban ai jinghikai kiba bha bad ba kordor ia la i khun.

Ka la jia ruh ba la wan poi ka sngikha jong i Sara.
Uta u kpa namar ba u ieit eh ia la i khun, u la kwah ban
pynsngewbha ia i da kaba ai sngewbha ia i daiei-re-ie i

ban pynsah jingkyinmaw ia ka sngikha jong i Sara Te, ha kata ka sngi, u la khot ia i Sara bad u la ong, “Khun baieit, heh ine i sati rupa ba nga kwah ban ai sngewbha ia phi na ka bynta kane ka sngikha jong phi, peit bha khun, phi iohi aiu ha ine i sati?” I Sara de, da ka jingkmien ka bym lah ong shuh i la khublei bad doh ia la u kpa, i la shim ia i sati, bad i khmih luk liak ia i baroh sawdong, bad shisyndon i ong, “Pa baieit, i sati iba shu sada du! Ngam iohi jingthoh dur ei ei ruh ha i ” “Nabar te sada keiñ,” la ong u kpa, “hynrei khun lada phin peit bha na shapoh, phin iohi lai tylli ba la ruid kyrdon kyrdon na shapoh jong i sati ”

“Kine lai tylli ki jylli khun,” la ong u kpa, “ki long lai tylli ki jingkwah jong nga ia phi. Kaba nyngkong, nga kwah ba phin long kum ka wah; kaba ar, ba phin long kum ki syntiew, bad kaba lai, nga kwah ia phi ba phin long kum u diengsning Te ia ki jingmut jong kine ki jingkwah jong nga, khun, phin sa shem hi da lade.”

Haba i la iohsngew ia kitei ki ktien, shiphang, i Sara i la sngewlyngngoh lyngngaiñ; la katta ruh i la shu ngeit bad kohnguh ia kaba la ong u kpa. I la sumar khop bad deng ia ita i sati rupa kat shaba i leit.

Ha kawei ka step ba phyrnai, i Sara i la mih ban iaidkai pyngngad sharud ki lum bad ki madan ba itynnad.

Te ha ka jingiaidkai jong i, i la dei ban ryngkang ia ka wah Kynsan kynsan i la sangeh khek namar ba i la kynmaw shaphang ka jingkwah u kpa jong i ba in long kum ka wah I la shu peitthuh thik ia kata ka wah, i da kylli ia lade, "Hato kane ka wah ka long kaba kumno?"

Kumne kumne i la iohi ia ki um jong ka ba ki tuid lem bad ka jingrisa shaw-shaw kum ban ong, "Ngi tuid shaphrang, ngi tuid shaphrang, da ka jingkmén khlem sangeh " "Pleng! kumne long ka wah," la ong i Sara, katba i jan bad ryngkang sha shilliang

"Mynta ngan leit phai pat sha ki jaka ba phuh ki syntiew ban peitthuh kumno ki long bad aiu ki don ban ong." Te kumne kumne i la wan poi sha ki ranab bad ki madan ba ithiang ha kiba ki 'tiew lum ba bun rong ki phuh byllien bad ki shad kynting sngewbha la ka khlieh ha ka lyer ba beh hir hir. Hapdeng kine ki syntiew, i Sara i la ieng da ka jingsngewbha bym lah ong shuh. Te katba i dang peit iapngiah, kumno-re-kumno i la sngew kumba ki pyrta jam ha ki shkor jong i "Ngi long kiba itynnad bad ngi long kiba iwbihi." "Da shisha kine ki syntiew ki long kiba itynnad bad ba iwbihi" la ong i Sara ha lade, katba i kdat la ka lynti sa sha ki jaka ba don ki dieng, ban leit wad sa ia u diengsning, i da

kyrmen ba u dieng ruh un pyni ei ei ha i ia la ka jinglong kumba
la leh ka wah bad ki syntiew.

Khala khala i la wan poi bad ieng hakhinat uwei
u diengsning. Hangta i la iohi ia ki tnat ba pyiar bad ba tngen
jong u bad ruh ia ka met jong u kaba beit bha bad ba i khlaiñ
bor.

Hadien kata, i Sara i la wart phai pat sha la ting
da kaba pyrkhath bha ia la ka jingshem. I la sdang ruh
ia kawei pat ka sngi da kine ki jingkut jingmut —
“Naduh mynta ai ba ka jingim jong nga kan long kum
ka wah; ban nang heh bad ban nang kynjoh shaphrang,
ai ba ka jinglong jong nga kan long kaba itynnad
bad iwbiñ kum ki syntiew; bad ruh kum u diengsning, ai
ba ka met jong nga kan long kaba koit ba khiah bad ba
khlaiñ.”

Ki Jingkylli:

1. *Aiu u kpa jong i Sara u la ai ia i ha ka sngikha ba
shiphew jong i?*


2. (a) *Don aiu shapoh jong ka sati?*

(b) *Kiei ki jingmut jong kito ki lai kyrdon ha ka
sati?*

.....

LYNNONG XI

KA NOHSNGI



- 1 Marwei halor u lum nga ieng,
 Ban peit ba premmiet ka nohkjat,
 Ka rong ka sngi, sawhuiñ ka deng,
 Ban jah shapoh bym lah pyrkhat

2. Na lum diengkseh, ki kohnguh khlieh,
Ka 'er batemon ka kynoi;
Hir hir ka beh bad jingiwbihi,
Ki syntiew iwbihi ki kyrsoi.

3. Sha krem ki mrad khlaw ki kyrkieh,
Ki sim bneng ruh ha la ki skum;
Masi, ki blang la jaka rieh;
Ki lyhuh ki sawa hum-shi-hum.

4. Lyngwiar bneng byrsaw lyoh phymai,
U 'Lurmiet u ieng ban phira;
Khlur ki sdang khongoid ia u bnai,
Ha suiñ ki mawlynnai ki ba.

Jingkylli:

*1. Thoh na la ka jingkylnmaw ia baruh ki dkhot na
ka jingrwai "Ka Nohsngi" da kaba buh artad bad ki dak
sangeh (punctuation marks) kiba dei.*

LYNNONG XII

KA JINGKREN SHAPHANG KA ILEKTRIK

Ka Kesia — Ko kong, sha, ha Sor ki tbeh sharak ilektrik?
Kaba kumno, phi kong kata ka ilektrik?

Ka Jemaima — Phin nym sngewthuh, phi hep lynda
phi iohi

Ka Kesia — Balei, kong, kaba kumno eh kata? Ka dei
ka sharak ksuid?

Ka Jemaima — Em phi, hep, ka dei ka jingstad ba ai
U Blei ia ki briew

Ka Kesia — Haba kumta te, balei, phi ong ym lah
batai?

Ka Jemaima — Ngan ym lah, lynda phi da iohi da
lade La katta ruh ngan pyrshang batai pynsngew-
thuh katba lah Phi ju iohi ia ka ñiangbading por pyrem,
ym dei?

Ka Kesia — Hooi kong balei, ka dei kum kita?

Ka Jemaima — Da sngap shuwa ia nga, ngan da batai.

Ka Kesia — To ngan sngap; kong, tangba wat slem.

Ka Jemaima — Ngan nym slem, ngan batai lyngkot katba nga lah. Phim iohi teng teng ki ba, teng teng ki lip, ym dei?

Ka Kesia — O, ka totshlait ruh ka long kumta.

Ka Jemaima — Niuma! Ba phi la iohi ia ka totshlait, phi lah ban iohjingmut khyndiat khyonsoit

Ka Kesia — Nga la sngewthuh, tang shu khein ka meh, tang shu khñiot ka lip.

Ka Jemaima — Hooïd, kumjuh ki leh bad ki sharak Sor. Mynshuwa eh, ha bym pat don sharak ilektrik, ki ong, ki leh kumne: Ki sieh da ki rishot man la ki lad jong ki surok. U nongleit tbeh sharak u kiew man ka janmiet ban pynmeh ia kawei-pa-kawei ka sharak. Dang step phyrngab u la leit kiew ban pynlip. Ka long ka kam kaba lut por bad bor. Mynta pat ki tang shu khem ia ka budam na kawei ka jaka, meh lut ka Sor baroh kawei. Bad tang shu khñiot arted ia ki budam pat la lip baroh shi Sor. Haba meh ilektrik ha Sor. ka phyrnai ka Sor mynmiet kumba phyrnai ki khlur ha suiñ por rngaw ka bneng.

Ka Kesia — Kaba sngewlyngngoh shisha lada ym da iohi hi

Ka Jemaima — Hā Sor bah lei lei kum ha Bombay bad Madras ki treĩñ, ki tram ki her bun phew mail shikynta da ka bor ilektrik Mynta ha ki ri shai kul ha Amerika, ki shet ki tiw ruh da ka ilektrik. Ki iakren na kawei ka iing sha kawei ka iing da ka bor ilektrik Ki sngap ia kaba iakren ha kiwei ki ri da ka bor ilektrik. Mynta lei lei ki sngap bad iohi artat ia u nongkren Bun bun ki jingphylla ngi nang ioh na ka bor ilektrik

Ka Kesia — Uei kong uba lap nyngkong eh ia ka?

Ka Jemaima — Ym don, ha ka jingshisha, uba lap nyngkong ia ka. Uwei u shem khyndiat Ia kata ka khyndiat la nang pynroi da uwei pat. Kumta ka nang iaid ter-shi-ter Ha ka jingshisha ka long Kawei Ka bynta kaba rit eh ba u briew u ioh kem na ka bor leilieh Ki sharak Sor kin leit long aiu ban ianujor bad ka jingshai leilieh haba ka ba da ki bun mail. Kumta ban ktah thala ia ki sainar ilektrik ka long kaba mynsaw. Bun bun ki kyllabadur kiba iap sdien ia lade ba ki sainar ilektrik ha shiteng suiñ ba ka bat ka bor ilektrik. Lada iwei i briew i shah bat ilektrik, lada phi leit bat ia i kan bat lem ia phi ruh. Kumta lada

ita i briew i khynñiuh rih ha ka jingbat ka ilektrik, phi ruh phin ia khynñiuh lem kum ma i. Kata ka long haba ka bor bat ka dang rit. Hynrei lada ka la jur, phin ia iap lang baroh arngut laingut kat kiba iabat. Kumta hei wat leit buitti ne lushia thala ia ka ilektrik.

Ki Jingkylli:

1. Nalor ban ai jingshai, ia ka bor ding ilektrik la pyndonkam kumno ha ki sor bah bad ki ri ha la kham shai?

2. Jia aiu lada phi bat ia u briew ba shah bat ding ilektrik?

.....

LYNNONG XIII

MEI, PA, KYNMAW IA NGA

1. Haba ka sngi ban khlad la poi,
Jingsngewsih dohnud buk kyrsoi,
Ki ummat kthang ban mih ruh kloï,
Bym sngew lah khlad te, Mei.
2. Haba ha iing marwei nga shong,
Nga tim ia jingsniewbok la jong,
Ban hap ban wan sha jngai kyndong;
Ba dung kura u khaw.

3. Sangsot marwei ha ri nongwei,
Nga thrang la phi, ko pa ko mei,
Nga long khunswet raitong marwei,
Mei, pa kynmaw ia nga.
4. Pynbud jingdwai jong phi ko Mei,
To kyrpad jingkyrkhu U Blei,
B'un ri sumar ha ri nongwei;
I'u khun baieit jong phi.

Ki Jingkylli:

1. *Thoh na la ka jingkyrmaw ia baroh saw tylli ki dkhoh na ka jingrwai "Mei pa kynmaw ia nga."*
2. *Batai ia ka jingmut jong ki dkhoh ba 2 & 3.*

.....

LYNNONG XIV

KA RANI AHALYA BAE

U Malkar Rao, u Syiem jong ka Indore, u la don uwei u khun uba kyrteng u Khandi Rao Une u Khandi Rao u la shongkurim ia ka Rani Ahalya Bae, hynrei u la iap noh shen hadien. U la don tang uwei u khun shynrang uba kyrteng u Mali Rao. Une u Mali

Rao u la kiew ia ka khet, ynda iap u kparad jong u. Hynrei une ruh u la iap shen khlem khun. Kumta ym don mano mano shuh ban kiew ia ka khet.

Ka Rani Ahalya Bae ka la iohi ba ka dei ma ka ban shimti ia ka kam synshar. Ha ka jaka ba kan khuslai pait dohnud ia ka jingiap kine ki lai ngut naduh u kparad haduh u ksiew, ka la pynkhlañ ia lade ban shong ha ka khet bishar. Ki la don ki 'riewrunar kiba pyrshang ban shet pyniap ia ka, hynrei ki iohi ia la ka jingbieit.

Ka Rani ka long ka nongbishar kaba khlaiñ bor. Ka la long kaba nep, kaba shlur bad kaba lap buit kloï. Ka don ka khmat kaba nep. Kam ailad iano iano ruh ban trei alhia ne leh bymsuidñiew. Kam shah iano iano kiba don ka mynsiem ban bat ia ki kam pyniaid hima sima.

La don uwei u lyngdoh na ka jait syiem uba kyrteng u Gangadhar. Une u la thmu ban pynhiar khet ia ka bad ban pyniaid hi ia ka hima. Ka Rani kam ailad ia u ban ia buitti bad ki kam hima sima. Ka la kren pyrshah ba un pyniaid la ki kam ki duk la jong kiba dei ia ki kam lyngdoh, Kane ka la pynsat sia ia u pyrshah ia ka, U la suh buit ia ki riewrangbah ban iashet pyrshah ia ka. Ki la thoh da ki jingthoh sha ka, ba kam bit ban

synshar namar ka long ka kynthei briew Ka la shu sngap bad kam shym jubab shikyntien ruh.

Ha ka jaka kata ka la thung da ki nongsyntiat ban khmih siar aiu kine ki nongshet ki thmu ban leh. Ka la pynkhlaiñ ia ki shipai ki swar bad ka la maham lypa ia ki ba kan donkam jingiarap na ki ha kano ma-kano ka khyllipmat. Ka tang shu sngewthuh ba ka la khlaiñ bha, ka la phah ktien sha ki, ka ong, "Ka long kaba bieit ia phi ban kren ne leh pyrshah kat ia ka syiem Indore, ka kynthei Maharata Namar ba phi ia pynkhih ialeh pyrshah ia la ka Syiem, nga hukum ban kem shisyndon ia phi." Kumta la kem lut ia ki bad phah sha phatok. Ynda hadien ki la pan map bad la pyllait, lait noh uwei u Raghoba ia uba la pynryngkang par.

Une de u la wad buit wad bor na ki Rajput ban hiarthma ia ka Indore Ka Rani ka la khmihlynti borabor ia ka jinghiarthma. Ynda ha ka jingialeh ka Rani ka la jop thiaw.

Nangta ka la pynbna ba kat uba lah ban pynkhuidd ia ka ri na ki Dakaid bad ki Thok, kan ai shongkurim ia la ka khun. Uwei u samla ba shlur bad ba donburom, uba kyrteng u Yashoban Rao u la ieng joit ban leh ia kane ka kam. U la jop thiaw ia ki Dakaid bad ki Thok bad ka Rani ka ai shisha ha u ia la ka khun jong ka.

Ka Rani ka la leh bun bun ki kam ba bha na ka bynta ka hima. Ka la seng ki jinglehisynai ia kiba duk. Ka la tih bun bun ki pung bad ki nan ha kylleng ka hima jong ka. Ka la tei bun bun ki iingshongthait ia ki nongiaid lynti bad ki temple ha kylleng ka ri. Ka la iap haba ka la synshar laiphew snem Ka nam ba bha jong ka ka la saphriang kylleng ka ri India naduh kjat ki lum Himalaya haduh tduh jong ka Ceylon

Jingkylli:

1. Kaei ka Rani Ahalya Bae? Thoh lyngkot katba phi tip shaphang jong ka?

.....

LYNNONG XV

KA BEH KHIAT Bynta I

Ka khiat ka long ka mrad kaba kum u kulai tang ba ka don reng. Ka don ki khnap kjat kiba kum ka jong ka blang, ba kumta ka lah bha ban her ia ka riat ka ram khlem lei lei Ki don ki riat kiba ieng rsheng

kum ka kynroh, hynrei ka her biang biang khlem hap, ur ne kyllon. Ka doh jong ka ka long kaba bang shibun.

Shisien ngi ialeit beh khiat ha kawei ka riat bad katba ngi dang iabeh ryngkat bad ki ksew uwei na ki lok jong ngi u jah jar. La ngi wad shano shano ruh ym man lap satia. Khatduh khatwai ynda ngi la iakynku kynkaw tynggeh ngi iohsngew kum ka jingsawa kynsan na kawei ka trai riat. Ng ialeit shata, hynrei ngi iohsngew pat ia ka jingsawa ka wan na shawei. Hangta te ngi la ia tharai ba la shah thok. Don kiba ong ba dei ka jingsawa suidtynjang.

“Hei ho! phi la thie kulmar phin sa shah rah soitan ne rong snaiap.” Kumta ngim nud thie , la katta ruh ngi dem iai kynku. Don pat kiba ong ba dei ka jingsawa mawsawa. Hynrei ka jingsawa kam shym pyrthuh ha ka rukom ba pyrta. Khatduh khatwai don uwei uba ong, “U thie ei u lok jong ngi hangthie ha thliw.”

La ngi pyrshang leit sha u, ngim lait Ng i la kylli kumno u poi hangta, u la jubab ba u hap na jrong riat. Kumta ngi ia thoh jymie bad pynhiar sha u ba un ioh bat bad u sa lait ban kiew haduh ha ngi

Naduh kata ka sngi uta u lok um ju treh leit beh
mrad shuh bad u thngad u thngaw artad naduh kata
ka jingjia.

.....

Bynta II

Shisien pat katba dang iabeh khiat kumta, uwei
na ki lok jong ngi, u hap jram shapoh riat Ngi la ialejt
wad ia u bad ngi shem ba la orpait ka shynrong khlieh.
Uwei na ngi u la leit bran bran sha shnong ban wad
nongshna, bad .la wan poi uwei u stad Uta de u la
sopspaiñ biang ia ka bad u la sur da u ksai ban pynbat
baroh sawdong. U la khum la teh da ki ñiut dawai bad ki
kynbat.

Uta u lok um shym tip briew shuh naduh kata ka
por shiteng sngi haduh ka por thiah mynmiet. Ngi la
iarah nangta bad leit sha shnong. Hynrei imat ba
dang bha hi la i sngi, ka jakhlia jabieng baroh ka tuid
shabar ka jingsop spaiñ Slem slem u don ha ka
jingbymithuh briew; bad suki suki u khie koit pat.
Kata ka jingiohi ka la pynsgew shyrkhei shibun ia
nga, hynrei katba ngan pat lap hi da lade, ngam
sngewthuh.

.....

Bynta III

Sha ki jaka kyndong, ia ki suloi ym ju kham pyndonkam, bun ki nongkyndong ki leit beh mrad tang da u sum, u shalyngka, ka wait, u khnam bad ka ryntieh

Shisien haba nga dang leit behmrاد bad u paralok jong nga sha thaiñ ri War, ngi iohsngew ia ka jingkynhait ki ksew bad ka jingiakynku ki briew Kyndit kyndit la wan mih u khiat, une shyeng shyeng la kum u kulai U lok jong nga uba don ha ranab riat u la pyllait da ki shara siat sim katba uta u khiat u dang kiew ia ka riat kaba ieng kum ka kynroh Hynrei u lait bad iohsngew pynban ba pyrtā, "Waw!" shaei-re-shaei

Nga la lyngngoh la jia aiū Bad hangta hi nga pyllait sa ma nga shi suloi thar, kata ruh da ki shara siat sim, ha mar ba u la poi ha mar tmier riat U sied shisien sied khadar pruh sha bneng thiaw bad u hap da ki kjat sbak ha ka pynthor kba kaba dang ktieh bha Ki ngam ki kjat jrip shapoh ktieh bad u sah kut den hangta. La u iasaid ban mih nangta um lait shuh Ha mar hangta wan poi ki ksew tiap. Ki kynhaiñ ia u bad na kadiang bad na kamon. Une u shu ieng pyneh tongheng. Nangta nga tied da ka ktang suloi na ka khmut bad u kyllon khrup

Mar kumta wan poi ki briew bad ki dawa ba dei u khiat jong ki. U paralok jong nga ruh u wan poi hangta. Hynrei kaba ilyngngoh ka long ba uwei na kita ki nongbeh mrad u la thliw ka trap shkor bad ka jaw snam jrep-shi-jrep la kum u Malkhos. Ngi la kylli, "Balei?" U la jubab ba ha mar ba riew thaiñ ka suloi shu sat laiñ ka shkor Ynda u la twad ka long thliw la kumba sam sohshkor ne langkymeng.

Ngi la shu ia ai ei noh ia u khiat sha ki ban iadep ia kata ka jingpynkynmaw ia uwei na ki, la ki ia pyneh shiphàng. Naduh kata ngim kham nud shuh ban leit behmrad sha ki thaiñ jong ki.

Ki Jingkylli:

1. Ka khiat ka dei kaei?

2. Jia aiu ha ka jingleit ia beh khiat ba u nongthoh u iathuhkhana ha ka Bynta-I?

3. Ha ka bynta-II jong ka Lynnong "Ka Beh Khiat" la jia aiu ia uwei na ki nongialeit beh khiat?

4. Ki pyndonkam da ei haba ki leit beh mrad mynshuwa?

5. Iathuhkhana lyngkot ia ka jingjia ha la jia ha ka por ba u nongthoh u la leit behmrad bad la u paralok sha ri War, kat kum ba phi shem ha ka Bynta-III jong ka Lynnong, "Ka Beh Khiat."

LYNNONG XVI

KA JINGIAIKYNJOH

- 1 Ngim don kɨ sner, ngim lah ban her,
Hynrei ngi don ki kɟat ban kiew,
Artet ngin par wat khlem ki sner,
Sha kliar ki lum te kum ki dkhiew

- 2 Ki mot bah Pyramit Ijipt,
Ba suh sah snar shapoh ki lyoh,
Ynda hajan ngi leit ban tip,
Pleng mawkyrdon ki don napoh

- 3 Kliar lum ba poi riewkhraw pyrthei,
Ym shym ia poi shisien sei bor,
Hynrei katba nangthiah kiwei,
Shimiet iashai ki trei khlem por

Kɨ Jingkyllɨ:

1. *Thoh na la ka jingkyrmaw ia baroh lan tyllɨ ki dkhoh na ka jingrwai "Ka Jingiaikynjoh", da huh ia ki dak sangeh (punctuation marks) kɨba det.*
2. *Kumno ngim leh ban poi sha kliar kɨ lum?*
3. *Ka mut aiu ki kliar lum hangne?*

.....

LYNNONG XVII

U LIAR SIRDAR MAWDEM

Naduh ki por hyndai, ha Ri Khasi jong ngi, la ju mih ki briew kiba khraw bad kiba phylla ha ki jaka jaka, kiba la im bad la iap khlem don jingkyrmaw shuh, namar bym don jingthoh jingtar shaphang jong ki Ngan iathuh hangne harum shaphang uwei u briew uba khraw uba na ki thain Ri Bhoi na Mawdem Ka kyrteng jong u ka long u Liar Namar ba la thung Sirdar ia u hapoh ka Hima Nongkhlaw, la tip paidbah ia u kum u LIAR SIRDAR MAWDEM

Ym lah shuh ban tip shaphang ki sngi ka jinglong khynnah jong u Tang kawei kaba ngi tip ka long ba um nang ban pule lane thoh namar ha ki por jong u ym pat don jinghikai pule kot pule sla ia ki briew na. kane ka ri jong ngi. Ka jingphylla ka long ba haba um long uba nang kot nang sla hynrei pynban u la long u riewstad uba phylla. Ngin sngewthuh shaphang jong u tang na kine harum ki jingiathuhkhana ba la iathuh da kiba la im la ia id ryngkat bad u

Ha ka por ka jingialeh syiem u Syiem Kine Singh, la don ka jingkhiih kaba jur ha ka Hima Nongkhlaw namar ba don arngut laingut ki nongiaknieh

ia ka long syiem U Colonel Herbert uba la long Deputy Commissioner ha kata ka por hangne ha ri Khasi Jaiñtia, u la donkam ban leit jied syiem haduh Nongkhlaw

U Kine Singh u la shitom jingmut shibun ha kata ka jingiakhih U la phah briew ban leit shaw ia u Liar Sirdar na Mawdem, kaba long shisngi lynti pura ban iaïd khlaïñ naduh Nongkhlaw Ym don ba treh ban leit namar ba tieng ym ia ki khla bad ki dngiem, hynrei ia u Liar Sirdar Ha kaba khatduh ym banse ban phah arngut ki myntri bad katto katne ngut ki briew ban synran lem U Kine Singh u la bthah janai pa-janai ba ki dei ban leh rit ha khmat u Liar Sirdar, ban ym kren ka sur hukum hynrei tang ka sur kyrpad suda

Ynda ki la poi ha Mawdem, u Liar Sirdar u la pdiang ia ki ha ki iing hynrei ym da leh kitkhia eh na ka bynta jong ki. Ki la thait bad thngan bha ym don pyrthei shuh na ka jingleit kaba jngai U Liar Sirdar u la leh burom ia ki da kaba phah kem kawei ka syiar kaba sngaid bha, bad la ai ia kata ha ki ba kin shet kin tiew hi. Haba la ih bad ja bad jyntah, bad ba la sngewum hin ka shyntur ban tah dohsyiar, ki la iashong khruï ban iabam ja noh Ynda ki la ia bam, haba dang khat ia ka doh na ka nar jyntah ka dei ka dohsyiar, hynrei haba ki tian ha shyntur kylla pat da ka pashor kait. Ha ka pliang te ka

dohsyiar hynrei ha ka shyntur da ka jyntah pashor kait. Ki la tieng ym don pyrthei shuh. Ki la iakhmih sa para briew khlem nang iakren shuh. Haba u Liar Sirdar u la kylli ia ki, “Kumno phi bang ka ja ka jyntah?” Ki la jubab da kaba tieng, “Hooid bang.”

Ynda la shai mynstep ki la iamih ban wan sha Nongkhlaw. Haba la poi ha dorbar, la ieng lai liang ki liang ialeh syiem

Haba la ieng u Liar Sirdar na ka liang u Kine Singh u la jer pateng ia ka jait syiem da ki shiphew khadar pateng bynnew haduh ba la pynlyngngoh ia ka dorbar baroh kawei. Kat kaba kren u Liar Sirdar shu kaba kohnguh suda ki artylli ki liang, bad u Deputy Commissioner u la shu rkhié. U Kine Singh u la ksan syiem na madan bad ki nongialeh jong u ki la shu rem hangta hangta hi.

Ki don shibun ki jingiathuhkhana shaphang u Liar Sirdar. Haba knia blang ma u, haba u pom ia u blang bhat dkut ka ryndang kyilon u blang hynrei khlem khlieh — ka khlieh ka la her shano ym tip.

U la long uba nang bha ia ki bun tylli ki jait ktien dkhar, bad uba stad ruh ia ki buit ba rieh na ri Khasi bad ri Dkhar. Ha kawei ka sien u la iakynduh bad uwei u kynja pukir nongleh jadu aiu re uba la leh kob shaba

palet U Liar Sirdar u la kob ia u ban iasiat da ka suloi
 parabriew U la ai ia la ka suloi ha uta u kynja pukir ban siat
 shwa ma u, uta u pukir um nud siat satia U Liar Sirdar u la
 ong ia uta u pukir ban ialoit ia ki sopti ban wah ha ka dieng
 kper bad ban siat ia ki da ka suloi Uta u pukir u la pdiang U
 Liar Sirdar u la loit la ka sopti bad u la tawah ia ka ha u dieng
 Haba uta u pukir u la siat, ka suloi ka pthei hynrei ki kuli kim
 mih, haba theh ia ki na ktang ki mih ki juh, ka sopti ka khlem
 lei lei Ynda la buh ka sopti uta u pukir, u Liar Sirdar u la siat
 bad la pei lyngba blait ki kuli, u ong artad, "Men im sa tang
 shitaiew"

U Liar Sirdar u la im hapdeng jong ki miad khlaw Ha
 kano kano ka por ba u kwah doh — doh skei, doh sier, doh
 syiar ne doh sim, u tang shu mih na iing, tang shu ioh ne tang
 shu lap ia ka dien, ne tang shu sngew ba pah, kata u la ioh
 wan bah sha iing Haduh katta u la long uba stad

U briew uba la im ha kata ka rukom, u la kylla
 Khristan haba u la rangbah bha Ynda u la long u
 Khristan u la bret lut ia ki jait jingstad jong u baroh kat
 kiba u la don Ngan iathuh tang artylli ki jingjia hadien ba u
 la long Khristan

Shisien katba u dang leit jingleit bad uwei u ksiew
 jong u ki iashong harud wah Khri ban iabam jasong

Katba ki dang ialoit jasang, shu hap kyndit ka sla shi song hamar khmat jong ki. U tymmen u la phah loit ha u ksiew jong u ban khmih don aiw hapoh. Ynda la loit, shem pynban da ki shñiuh miaw kat shikyndup. U Liar Sirdar u la shu rkhie, bad u la ong ha la u ksiew ba un leit bret noh ia kata ka song shapoh wah u da ong artad ba mynta ba u la long Khristan ym donkam shuh ban iathew markylliang ia kaba sniew. U la iathuh ba u nongshun u thmu ban phah ia kita ki shñiuh miaw shapoh ka kpoh jong u, hynrei ym lah. Lada u mon u lah ban pynphai noh ia kita ki shñiuh ban leit sha ka kpoh uta u nongleh.

U Liar Sirdar, ynda u la long Khristan u la sdang ban hikai pule kot bad u la nang bha ruh. U la long u rangbah Khristan uba lah ban shaniah haduh katta katta ba u la kiew shaduh ka kyrdan Pastor.

Ha kito ki por ka long ka kam kaba eh katta katta ba uno uno u Khasi ne u Phareng un tur lyngba ia ka Ri Bhoi. Ka ri baroh ka la hap ha ka kti u Liar Sirdar ba un khmih. Da ka jingtrei shitom jong u la seng ia ki skul ha ki bun tylli ki shnong bad u ju leit jingleit ia ka ri baroh kawei man ka snem.

Ha kane ka rukom u Liar Sirdar u ju leit jngoh ia ki Balang bad u ju leit pyniathoh shongkurim shisien shisnem ha ki shnong baroh. Bunsien bunsien ha ki

jingiathoh shongkurim ka ju shait jia kumne:- Ynda la dep ia ki ar ne lai jur ba la pyniathoh ha jingiaseng, u la ju ong ia kiba iashong synran, "Nga te nga i lub ba ma phi uta uta bad ita ita ba phin iathoh noh te." U ong ba un wan jyn haduh sa shisnem hadien. Lada ki iammon te un pyndep noh. Nangta u kylli ia u shynrang, "Kumno phi mon?" Kham bunsien eh un ong, "Nga mon, lada ita ita i mon." Tang shu iakohnguh kumta, u Pastor un khot ia ki kmie ki kpa jong ki baroh arliang, ban batai ia ki. Haba la ong i Rev. Liar Sirdar ym ju don mano mano ban ong, "Em."

Ki Jingkylli:

1. *Uei u Liar Sirdar?*
2. *Kumno u Liar Sirdar u la iarap ia u Kine Singh ha ka por ialeh syiem jong u?*
3. *Ha ka kam niam, u Liar Sirdar u la hat ia ka kam kam uei?*

.....

LYNNONG XVIII

KA RANGLI BAD LA I KHUN

Bynta I

Kawei ka khunswet kaba iap noh ki kmie ki kpa naduh ba ka dang khynnah ka la shong bad ka kmiesan jong ka, kaba atlukhi bad domriang. Kam ju sngewbha ba kane ka khynnah kan ioh ialehkai lehkmien kum ki para khynnah baroh Kam lah shah ruh ban iohi wat shisien ruh ba kan phuh samrkhie Kine ki jingleh bad jingmangring jong kane ka kmiesan ki la pynlong ia kane ka khynnah ba kan ringsdot haduh ba ka la raikhoh kum ka nap.

Ynda haba kane ka khynnah ka la sdang khie samla lei lei, ka kmiesan ka la sdang sa ban tharai sniew ia ka bad ban nym shah ia ka ban ia iaaid ne iakren bad uno uno u jait samla briew, ka jingsngewsih jong kane ka khynnah ka la nangkhraw nangkhraw katba nangiaid ki sngi ki snem. Da ka jingbymlah shah shuh ia kine ki jingthangding jong ka kmiesan ka la kylla long kum kaba lamwir. Ha kawei ka sngi katba ka dang leit sha pynthor ban leit puh ka la shongthait ha shiteng lynti. Ka la phai sha ki ranab lum bad ka iohi ia ki masi ba ki iabam phlang bad ia ki khun masi ba ki iamastieh.

Ka la iohi ruh ia ki khynnah ap masi ba ki phawar sngewtynnad' Ka la iohsngew ia ki sur ba thiang ki sim bneng ha khlaw ba ki da iaroh ia u Trai Nongthaw Ka la mad ia ka jingitynnad jong ki rong ba bun jait jong ki syntiew, hynrei "Kordit ia nga," ka la ong, haba ka la phai sha la ka jong ka long rnyieng kaba long mar khongpong Ka la sdang ban kynmaw naduh ka sngi nyngkong ha kaba ka jingjynjar ka la nguid tylli ia ka Ka jaw ki ummat bad ka pait ka dohnud ba ka da sngewsynei eh ia lade namar jingshempap ha sla pyrtnei Kumta ka la pyrtnei jam wei briew ka da ong, "Ah lada don ba rah noh ia nga shano shano ngan bud khlem artatien tang ban lait noh na ki tyrsim jong kane ka kmiesan jong nga "

Katba ka dang pyrtnei ia kine ki ktien, uwei u samla uba dang ia id lynti leit bylla nangta u la iohsngew ia kane Khop u la shong sngap kai shiphang Hangta ka shu wan ka jingsngewsynei ia kane ka riew lanot sniew kupar Sor u la leit hajan bad u la kylli ia ka, aui eh ba ka shempap ba ka da kren tohmet ia la ka kmiesan bad ia lade haduh katta katta Ka ruh ka la iathuhkhana naduh kaba sdang haduh kaba kut Une u samla u la khmih isynei ia ka bad haba u la puson shiphang, u la kylli ia ka la kan bud noh ia u ne em Kane ka khynnah ruh khlem

LYNNONG XVIII

KA RANGLI BAD LA I KHUN

Bynta I

Kawei ka khunswet kaba iap noh ki kmie ki kpa naduh ba ka dang khynnah ka la shong bad ka kmiesan jong ka, kaba atlukhi bad domriang. Kam ju sngewbha ba kane ka khynnah kan ioh ialehkai lehkmien kum ki para khynnah baroh Kam lah shah ruh ban iohi wat shisien ruh ba kan phuh samrkhie. Kine ki jingleh bad jingmangring jong kane ka kmiesan ki la pynlong ia kane ka khynnah ba kan ringsdot haduh ba ka la raikhoh kum ka nap.

Ynda haba kane ka khynnah ka la sdang khie samla lei lei, ka kmiesan ka la sdang sa ban tharai sniew ia ka bad ban nym shah ia ka ban ia iaaid ne iakren bad uno uno u jait samla briew, ka jingsngewsih jong kane ka khynnah ka la nangkhraw nangkhraw katba nangiaid ki sngi ki snem. Da ka jingbymlah shah shuh ia kine ki jingthangding jong ka kmiesan ka la kylla long kum kaba lamwir. Ha kawei ka sngi katba ka dang leit sha pynthor ban leit puh ka la shongthait ha shiteng lynti. Ka la phai sha ki ranab lum bad ka iohi ia ki masi ba ki iabam phlang bad ia ki khun masi ba ki iamastieh.

Ka la iohi ruh ia ki khynnah ap masi ba ki phawar sngewtynnad' Ka la iohsngew ia ki sur ba thiang ki sim bneng ha khlaw ba ki da iaroh ia u Trai Nongthaw. Ka la mad ia ka jingitynnad jong ki rong ba bun jait jong ki syntiew, hynrei "Kordit ia nga," ka la ong, haba ka la phai sha la ka jong ka long rynieng kaba long mar khongpong. Ka la sdang ban kynmaw naduh ka sngi nyngkong ha kaba ka jingjynjar ka la nguid tylli ia ka Ka jaw ki ummat bad ka pait ka dohnud ba ka da sngewsynei eh ia lade namar jingshempap ha sla pyrthei Kumta ka la pyrta jam wei briew ka da ong, "Ah lada don ba rah noh ia nga shano shano ngan bud khlem artatien tang ban lait noh na ki tyrsim jong kane ka kmiesan jong nga "

Katba ka dang pyrta ia kine ki ktien, uwei u samla uba dang iaaid lynti leit bylla nangta u la iohsngew ia kane Khop u la shong sngap kai shiphang. Hangta ka shu wan ka jingsngewsynei ia kane ka riew lanot sniew kupar. Sor u la leit hajan bad u la kylli ia ka, aiu eh ba ka shempap ba ka da kren tohmet ia la ka kmiesan bad ia lade haduh katta katta Ka ruh ka la iathuhkhana naduh kaba sdang haduh kaba kut. Une u samla u la khmih isynei ia ka bad haba u la puson shiphang, u la kylli ia ka la kan bud noh ia u ne em Kane ka khynnah ruh khlem

kylliang ktien ne kylli bniah shaphang jong u ka la shu kohnguh beit ban bud noh ia u tang ban lait na ka khmat jong kata ka kmiesan.

Namarba une u briew u la iohsngew ia ka jingrunar bad jingbymkheĩñ briew jong kane ka kmiesan, u la sheptieng ioh ka wan lane phah kem Kumta u la ialam ia kane ka khynnah sha ka jaka ba kham jngai bak. Ki la iaĩd bun bun sngi lynti, tad haduh ba ki la poi halor uwei u lum uba kynjang bha. Hangta ki la iasher dara ban iashong noh. Lah ban iohi ia kawei ka shnong briew hangta. Ynda ki la iashong katto katne sngi, u shynrang u la leit wad bylla ha shnong briew, bad ka kynthei pat ka trei ki kam rit kam ria ha iing khnang ban kham myntoi, ka da sngewkylluid mynsiem ba la lait na ka kmiesan, ka sngew kumba la khuid ksuid

Ynda ki la iashong katto katne snem hangta ki la ioh khun kynthei iwei. Katno ki la iakmen ban iohi ba ki sngaid ki plung bad ki iakhiah krat. Hynrei u lyoh ba dum jong ka jingktang ka jingim u wan ban tap biang ia kane ka rangli shempap ha kaba une u lok ba ieit thepmynsiem eh jong ka u la pang jur. Ka la pyrshang ban wad dawai bad ban sumar ia u hynrei um man koit satia.

Ha kata ka shnong kaba hajan jong ki la don uwei u briew uba long u nongaiksuid bad u nongshohnoh

briew Ha ka por ba u lok jong ka u pang jur, une u briew u shait wan kai borabor, ym da ka khmat sngewsih hynrei da ka khmat phuhsamrkhie bad kmen katba kane ka khynnah pat kam lah ban set ia la ki ummat Ha kaba khatduh u lok jong ka u la iap, bad shwa ba un iap u la kren tang kine ki ktien khatduh - "To sumar ia la ka khun, ngam tip aiu kanjia ia phi "

Mar iakut kine ki ktien u ruh u la dkut mynsiem noh Ngaiñ ka dum ka bneng ka khyndew ha ka pyrthei jong kane ka rangli Kam tip shuh mynta aiu kan leh Shaei kan iaid bad kumno kan im Ym don ban wan iapyntngen lem ia ka

Ila kata ka miet kaba bud, uta u briew u tang shu tip ba la iap u lok jong ka, u la kmen haduh katta katta, bad mar mar u la leit u da ialam bad lai ngut ki lok ban leit pyniap noh ia ka bad ia ita i khun rit Namar ba kata ka shnong ka kham pajih, ki la poi hangta ha iing jong ka haduh 12 baje mynmiet Khlem kren ki la sdang ban kyndar ia kata ka jingkhong. Kane ka khynnah ka la iohsngew siw siw saw saw ia ka jingiakren bad ka sngewthuh ia ka sur jong uta u briew kaba u da mut ban wan pyniap noh ia ki baroh arngut shikhun Kata ka jingkhong ka la jan lait Ka la duwai marwei hangta sa tang ha U Blei, bad ka la kren wei briew, "Ah ka apot aiu kat kane ia nga?" Ynda ka la dep duwai ka la poi

pyrkhat ban phet noh shabar. Kumta ka la rung ha ka tyngkhap iing kaba lait khyndiat ka da bah ia la i khun sha khmat. Ka iaaid sumar ba ioh i khunlung in iam. Ka la pynkloi katba lah Ka la lait na iing, hynrei hamar ba kan rung shapoh lawbniap ba harud, ka la hap ka tupia jong ita i khun. Ka sngew kumba ki la iohi, kumta ka khlem lap tam bad ka la par sor shapoh ñiut. Hangta ruh ka sngew kumba kin lap ia ka, kumta ka la par sor sor ka da poi jingmut ban phet noh shata sha shnong briew la kumno kumno ruh. Ha ka jingdum jong ka miet ba kat kata, ka par ia iap ban poi shata sha shnong.

Haba la poi hajan shnong, ka la dei ban iaaid lyngba ia kawei ka khlaw. Tang mar iarung hangta ka la sngewphieng, hynrei ka la pyneh dohiap. Ngong! ka la iakynduh ia uwei u khla ba dang lah bam briew nangta na shnong. Une u la mut ban ktha noh ia ka bad ia ita i khun. Ka la ksaid jubor ban phet, hynrei namar ba ka phai kynsan ban phet ka la dkut ka jingit thui, bad ita i khunlung i la hap ha tbian. Ban tam ia i kam lap shuh ba la kyrhuh eh u khla. Ka la phet iap ialade shata sha shnong ban iawei briew ban wan iarap lem ia ita i khunlung. Kita ki shnong ki la iasngewlyngngoh ia kata ka jingleit lynñiar jong ka. Ki la ia mih bad ki la iasngewlem ia kata ka jingjia. Ki la leit baroh shata sha khlaw ban wad, hynrei ka long lehnohei namar kim shym lap ei ei hangta ha khlaw hynrei ki lap pynban

tang kata ka jingit ba dkut lyngkhot lyngkhai bad ki dien khla ba ishyrkhei Ka jingpait dohnud jong ka kmie ka long kaba ym lah batai shuh ha pyrthei Ki la pyrshang ban pyntngen ia ka hynrei kim lah Te ki la leit pynbuh kam shakri ia ka sha iing jong uwei u syiem ba kan tang im ja kpoh Une u long u Syiem uba runar kham palat ban ia ka kmiesan jong ka Kumta ka la im swai im sdot hangta ha la ka bukhoh mynsiem

KA RANGLI BAD LA I KHUN

Bynta II

Phi tip ka la jia aiu ia ine i khunlung? Uta u khla u la rah ia i bak sha kawei ka krem kaba jngai bab U la ri ia i, u la ai bam ai dih bad pynsuk pynsaiñ U leit tuh ka bam ka dih, ka ban wan rah sha ita i khunlung Ynda la iaiaid ki sngi ki snem ine i khunlung i la nangsang bad i la sdang khie samla

Naduh ka por ba dang lung, kumba ju long ia ki khunlung ha ki por ba mynshuwa, ki shait pynteh ksai na syngkai Te ia ine i khunlung ruh la teh ksai bad la teh ruh ia i dur rit jong u kpa jong i 'iba da ka tama Ynda ka la sdang samla ka la buh khop ia ita i dur, ka da kwah ruh ban tip na ei ka wan poi shata bad kiei ki

kmie ki kpa jong ka. Ka jingbhabriew jong kane ka khynnah ka la long palat liam. Une u khla um ju shah ba kan mih thala shabar, hynrei u shah ba kan leit sum tang shisien shitaiew sha kata ka umbah ba tuid nangta na khmat krem.

Ha kawei ka sngi, leit jia ryngkhat ba u khun jong uta u syiem ba leit shong shakri ka kmie jong kane ka khynnah u la leit poi behmrad shata bad la ki shakri. Ka la dei ruh ka sngi ba ka mih leit sum kane ka khynnah. Te hamar ka por ba ka dang sum, une u khun syiem u la leit iohi liak. Ka jingbhabriew, ka jingitynnad bad ka jingluilui jong kane ka khynnah ka la pynshohbieit ia u U la ai hukum ia la ki shakri ban leit beh ban kem ia ka Kane ka khynnah tang shu mar ia iohi, ka la phet bak sha krem. Ki la pyrshang ban leit rung shapoh krem; hynrei kim i nud. Mar kumta de wan lap sa uta u khla lem bad bun ki lok jong u. U khun syiem bad ki shakri jong u ki la sheptieng bad kim banse ban her iap sha iing.

U khun syiem um shong suk satia, u shu i sngewsih bad khuslai. Um bam um dii. Ynda la kylli ki kmie ki kpa, balei ba u sngewsih, u la iathuh de ia kaei ba u la lap hangta ha khlaw. Bad u ong ruh ba un ym hun ban im lymda u ioh ia kata ka khynnah ban wan rah sha iing.

U kpa u la hukum ia ki shipai ban leit wad ia kata ka khynnah. La phah rah bad suloi bad man ban ialeh ia kita ki khla. Ka la long ka jingkhynwin kaba khraw ha kata ka shnong ban leit wad briew phylla sha khlaw kaba kim ju iohsngew. U khunsyiem ruh u leit ryngkat bad ki ban leit kdew hi da lade ia kata ka jaka ha kaba ka don. Uta u khla u la sngewthuh na sha jngai ba don briew ba wan shata. Khuk khak u la wer ia ki lok ba hajan ban ia wan lum ha kata ka krem, namar u la shem ba don tang ki shakri u Syiem kiba wan pynkulmar. Khruirui-rui la wan ialang kita ki khla hangta ha khmat krem. U khunsyiem u la hukum ia ki ba kin thep kuli lpa Kine ki khla ki tang shu-iohi ba ki la thep kuli, ki la kynrup pum pum sha ki briew. Hangta ka la long ka jingialeh kaba jur. Bun bun na ki shipai ki la iap, hynrei ha kaba khatduh baroh kita ki khla ki la iap lut. Ki la rung shapoh krem bad ki la sei ia kata ka khynnah. Kam treh namar ba ka sheptieng, hynrei ki la pynbor ia ka ban leit. Ki la shu ring jubor ia ka haduh ban da poi ha iingsyiem. Ka la long ka jingkhawai bah bun sngi lynter namar ba u khunsyiem u la ioh ia kaba u kwah.

U Syiem u la pynbna ha ka hima baroh ba u khun jong u un shongkurim noh. La khot sngewbha ia baroh ban wan. Ym slem hadien nangta u Syiem u la iap noh ba u la tymmen eh. Kumta ka khet ka bishna, ka bishar ka khadar baroh ka la hap ha ka kti une u khun bad

kane ka khyannah. Kane ka long ka Syiem kaba sbun, ba bha bad ba jynsur mynsiem.

Haduh kane ka khyllipmat kam shym pat ithuh ia la ka kmie kaba long ka shakri jong ka hangta, bad ka kmie ruh kam phohsniew ei ei ba kata ka dei ka khun jong ka. Te ha kawei ka sngi, ka Mahadei haba ka peit kai ia ki shakri shakor baroh, ka iohi ba ki iphuhmut phuhmat namar ba ki sngewtynnad ban ioh da ka Mahadei kaba sbun bad ba bha kum kata, hynrei napdeng kita baroh don tang kawei kaba shu ityrkhong sngewsih, kumta ka la khot ia ka sha la ka kamra thiah ban kylli, balei ba ka idiauw mynsiem eh, bad don jingbysuk aiu ba ka shem hangta Kane ka shakri ka la iam ka da nguh da dem bad ka la ong, "Ko Mahadei kynrad, ngam shem jingthut ne jingsngewsih ei ei na phi Ka jingbha jingsbun jong phi ka la biang, hynrei nga sngewsih haba nga phai sha la ka jong ka apot " Ka Mahadei ka la pynbor ia ka ban iathuh ia kaba la jia baroh. Ka shakri ruh ka la leh kumta Ter ter ka la iathuh bad ka la poi ha i bynta ba la ioh u khla ia i khun jong ka, ka da ong ruh ba kam tip la u la pyniap ia i ne u dang pynim. Hamar hangta, kane ka Mahadei ka la kyndit thred namar ka ia lade ruh ka wan na krem u khla Ka shakri ka la iathuh ruh ba ka da teh ha ka syngkai jong ita i khun ia i tama ha kaba la shon ia ka dur u kpa jong i Kane ka khun ka

la kynmaw ia ita i tama ba ka la buh khop baroh shikatta. Ka la sngewthuh shai ba ka dei ka kmie jong ka kam lait kren shuh shiphang ka da jaw bad ki ummat. Ka la ieng kynsan joit ban leit shim ia ita i dur tama. Ka la pyni ha kata ka shakri. Kane ka shakri ka la sngewthuh ba pleng kata ka Mahadei ka dei ka khun jong ka pynban. Ka Mahadei ka la kdup khop ia ka, ka la doh bad ka iam ka da ong artad, "Mei, haduh katne phi long ba phi sngewsih namar jong nga Naduh mynta phin shong bad nga ha ka khet bishar jong nga!"

Kumta ka la long ka jingkhawai bah sa shisien ha kata ka jingsyiem. La ai hukum ban ai jingpynsum pynsait ia kata ka kmie jong ka Mahadei bad ban pynphong jaiñbha jaiñmiat ia ka de. Naduh kata, ki la im suk im saiñ baroh shi-iing. U lyoh ba dum jong ka jingktang bad jingsngewsih um shym lah shuh ban jngoh halor jong ka.

Ki Jingkylli:

1. *Kumno ka rangli shempap ka la iakyndih. had la u lok?*
2. *Jia aiu ynda ka la ioh khun?*
3. *Jia aiu ia i khun ka rangli?*
4. *Kumno ka rangli ka la ioh jingsuk pat ha ki sngi ka jinglongtymmen jong ka?*

LYNNONG IX

KI SHRIEH BAD KI SIM

Shikynhun ki shrien ki iashong iasah halor kawei ka 'lawlynnong, ki iabam da ki soh bad ki jhur khlaw katba ioh. Katba dang syaid ka bneng, kim don jingpyrwa ei ei. Kine hai hai tang ka jingsngewbha suda Hynrei ynda mih ka tlang bad ka sdang trei ka khriat ia ki, kine phew rymbaiñ sa tang ka iashri Ka ding, ka theh ruh kim ioh ban syaid

Ha kawei ka sngi ki leit lap shilyngkhot u pai talu uba la ih bha. Ka snep jong u kane ka saw hoiñ hoiñ ha ka phymai, ha ka ithiang. "Une te u la dei u rnga ding," ki ia ong. Hangta ki la leit wad diengiapi bran bran bad ki la tei shistui halor ita i lyngkhot pai. Ki sa iashong khruai bad ki iapysad pho-shi-pho ia ita i pai, ban dup meh ding ba kin ioh iasyaid.

Ka sim kaba shong halor u dieng uba hajan hangta ka la isynei shibun ia ki bad ka la ong, "Phuit ka shrieh bieit, kato kam dei ka ding! Keiñ noh wat iapysad ei", hynrei la ka ong katno katno, ki shrieh ki leit iohsngew shaei haba ki dang iadem sia-shi-sia ha uta u rnga pai jong ki. Shibit wan poi sa kawei ka sim bad ka la ong ia la ka tok, "Tò leit iakren ma

phi. U briew u ban sa iap jyllop ha um, u kynrup wat ia u 'langiap. Hato balei ki shrieh kiba nang ia khynñiuh khriat that-shi-that kin ym iapysad ding ia u pai talu? Ai kin ia pyrsad seh, haba ki da iakwah kiba pli. Kan ym lei lei ia phi, bad ia ki ruh kam pynmysaw ei ei "

Hynrei kata ka sim kaba nyngkong kan leit sngap shano ia ka lok jong ka Ka nang sngewsat pynban ba ki shrieh ki leh bym salia kumta ia ka jingsneng jingpyni jong ka. Nangta ka la her na u dieng ban leit dem hamar pdeng ba ialang ki shrieh, bad ka la ong da ki 'tien bitar ba kin iakeiñ noh. Ki shrieh ki la nang sngewingkhong ia ka jingwan pynwit bad korbar kata ka sim, bad uwei na ki u la kem ñiat bad u la bthat ar lyngkhot ia ka "

Kaba mynsaw ban sneng ban kraw ia kiwei haba kim pan buit ne jingsneng na phi.

Ki Jingkylli:

1. Ha ka jingkhriat ka tlang ki shrieh ki sliew ding da nei?

2. Mano ba la beiñ ia ki bad kumno ki la leh ia kata ka nongbeiñ?

3. Kaei ka jingsneng ba ngi lah ban ioh na kane ka jingiathuhkhana?

.....

LYNNONG XX

KA SYNRAI

- 1 O, sngewtynnad ka por Synrai,
 Pyrthei bad bneng shu khliir!
 Ki khlaw ki btap la rong phyrnai,
 Lyer pyngngad ruh hir hir!
 Kat shaba khmat jong ngi ka phai,
 Tang jingsngewbha suda,
 Sawdong jong ngi, ki lum ki wah,
 Jingrwai ki pynsawa.

2. Khmih ki lyntait ha suiñ phyrnai,
 Ki her, thapñiang ki pyiar,
 Ki suh ki kiëw, ki ialehkai
 La ki sner ki siang diar!
 Ki sur bun jait u ngap u lwai,
 Ba ka wan rong ka lyer,
 Ki sim ruh la ki sur jingrwai,
 Na tnad dieng-ki pynher.

Jingkylli:

*1. Thoh na la ka jingkyinmaw ia ka jingrwai "Ka Synrai"
 da buh bad ki daik sangeh (punctuation marks) kiba dei.*

.....

LYNNONG XXI

U THARAI BAD U BUHTENG

Ha kawei ka por la don ki briew kiba don uwei u khun shynrang uba ki jer u Tharai. Mynba u Tharai u dang khynnah u la long uba isianti ha ka buit ka ak bad uba bit ha ki kti ki kjat jong u Ka jinglong jong u ki la ai jingkyrmen ia la ki kmie ki kpa ha ka lawei jong u, bad ki ngeit ba hadien habud un long u ban paw lynda don kaei-re-kaei ka ban pynkylla khongpong ia u

Ki kmie ki kpa ki la shai jingmut ba ka bha ban phah skul ia u Tharai. U Tharai ruh u la pynpaw ba u long uba minot, uba smat ba sting bad uba nep ha la ki jong ki kam. Hapdeng ki para khynnah, u Tharai u don uwei u paralok, u Buhteng, bad dei bad u ba u iajuh iajan eh Ka jingialong lok jong kine amgut ka la long kaba iajan haduh katta kaba ñiar eh ba kin iakhlad uwei na uwei pat bad ka jingiaphylliew jingmut jong ki uwei ia uwei pat ka la long kaba la palat.

Ha kawei ka sngi katba u Tharai u dang shong ha shakiar ñing ban pule la ki kot ki sla, la wan u Buhteng bad u la iawer ia u ban leit ialehkaí. U Tharai u la ong, "Nga mut ban pyndepnoh shwa ia ki kot, bad tharai, kata kan kham bha khnang ban suk lashai." U Buhteng

u la kylliang ktien bad u la ong, "Hooïd, nga ruh nga mut kumta keiñ tangba, to ia phi ngin ialehkai shwa shipor te ngin sa iakhreh keiñ." Ynda ꞑ Buhteng u la khroh eh, u Tharai da kaba u tharai ba u la lah hi ban pyndep ia la ka lynnong, u la leit ialehkai noh shuwa. Ynda ki la ialehkai kumta la lap kaba miet ym long pule kot shuh Kumta lashai mynstep shuwa ban leit sha skul, u lok jong ꞑ, u Buhteng u la wan bad u la kylli ia u la u lah khreh ne em ia la ki kot U Tharai u la iathuh ba ym shym ioh por shuh ban khreh kot namar la lap ka miet ka ialehkai Hangta u Buhteng u la ong, "Nga ruh ngam shym ioh pule kot shuh keiñ. Nga sheptieng ioh mai i Babu, to phi iapep skul noh shisien mynta yn sa ialeit pat lashai ynda khreh kot shwa la syit janmiet." U Tharai u la ong, "Tharai i Babu in mai keiñ lada ym lah kot, to phi mat iapep noh mynta shisien." La shibit janmiet u Buhteng u la leit biang sha u Tharai bad u la khroh ia u ban leit ialehkai. U Tharai ha kaba nyingkong um treh namar, u la mut ban pule kot noh Shipor ki la ia khing, uwei u pynbor ban leit ialehkai, uwei pat u pynbor ban khreh la ki kot ki sla. Ha kaba khatduh u Buhteng u la jop da kaba ong, "Balei phin salia katta katta mynta ba dang sdang ka snem, la phi khreh ruh kam myntoi hi, ynda la jan ka eksamin te yn sa minot de triang. Kata te khreh ruh katba da khreh keiñ, ym klet shuh." U Tharai u la shah jop namar ba u tharai ba ka jingong u Buhteng ka long kaba dei.

Kumne ki sngi ki bnai ki la nangiaid, bad ka jingthrang u Tharai ban minot la ka kot ka sla ka la sahkut ha ka jingbuhteng Ha kawei ka sngi haba kine baroh arngut ki paralok ki iashongkai, u Tharai u la pynpaw ha la u lok ia la ka jingbabe ba um lah shuh ban pyndep la ka jong ka kam U Buhteng u la ong, "Hoooid keiñ, kaba ong ma phi ka dei eh. Ba dei keiñ ban sngewsih lada ym lah ban khreh la ki kot hynrei nga pat ngam da sngew lei lei eh ia kata." U Tharai u la ong, "Phi te ba phim kwah ban pule te phim sngew ei ei keiñ, nga pat ba nga kwah ban pule te nga la duh phi." U Buhteng u la ong, "Ym dei phi ba ngam kwah kum ma phi, hynrei sngap ngan iathuh ia phi Ki tymmen ki ong ba ym bit ban pule than haba dang khynnah ba danglung ka jabieng, ioh kylla luiñ pynban Nga te nga sngewdei eh ia kata, bad ban ia kaba pynsniew ei la ka jabieng, te nga pyrkhath ba lah kaba sangeh shuwa ka leit skul. Phi ruh da pyrkhath bha, lah kaba sangeh shuwa, sa ialeit pat ynda la kham heh kham san Hangta te kat ba pule ruh ka la sah ha ka khlieh." U Tharai u la kylli, "PHi tharai ba ka long kumta shisha?" "Hoooid keiñ, nga te nga sngewdei bad sngew shongnia ia kaba ong ki tymmen," la ong u Buhteng. Kumta ki la rai ban sangeh noh ka leit skul bad kumta ki la iapep ka leit skul.

U Tharai u la iathuh ia la ki kmie ki kpa ba um pat kwah leit skul ba dang khynnah eh, bad ba un leit pat

ynda la kham sngewthuh, bad ban shu khreh noh shwa ha la iing mynmiet mynstep. Ki ruh namar ba ki long kiba bieit ialade kim da sngewthuh bad sngewmyntoi ia ka jingkordor ka jingshongskul bad ba ki la kwah ban ioh myntoi da kaba pyntrei kam noh ia la u khun ki la shu sngap Kumta u kpa jong u u la ialam ia u sha lyngkha, bad ynda u la hikai ia u katto katne sngi, u la aiti ha u ia kawei ka jaka ba un trei pyndep.

U Tharai ruh u la sdang ban sngewtynnad, u da pyrkhat ruh ba un kham lah ma u ia u kpa uba la noh ka met. U la sdang ban leit trei ia kata ka bynta ba la ai ha u bad u la trei minot thop man ka sngi. Ha kawei ka sngi u la lap ia u Buhteng ha lynti. Haba ki la iaaid katto katne, u Buhteng u la ong, "Sha kine ki thain te phi, la bun sat ki nai rabbit. Ia ngin iabeh rabbit shwa shipor." Ynda u la pynshad khawiang ia u, u Tharai ruh u la leit iabeh rabbit noh bad kumta la lap ka miet. U Buhteng u la ong, "To ngin ia wan trei pat lashai phi." Kum lashai pat ynda ki la poi ha lyngkha, u Buhteng u la kdew sa da ki sim bad la pynshoi ia u ban ialeit riam sim noh shuwa. U Tharai ruh da kaba u tharai ba ym lei, lei ia rat shipor u la leit bad kumta la bijai eh ka sngi baroh kawei. Ha kawei ka sngi ba shit than ka sngi, rieh tngen noh shwa, bad ha kawei pat ka sngi ba dum bad ba khriat eh ka bneng, syaid ding noh shwa, ia ka kam pat la shu buhteng ban trei pat.

Ynda la kumne-pa-kumne shu buhteng la ka kam baroh bad la pulom ka trei ka ktah U Tharai ruh da ka buit u Buhteng u la sdang ban shukor sa ia la ki kmie ki kpa da kaba ai bun ki dav Kumne keiñ ki sngi ki snem u Tharai ki la lehnohei namar ba la jop u Buhteng. La u mut ban rep ruh ym long, la u mut ban shu iaid khaii noh ruh ym long, la u mut ban shu shong shakri noh ruh ym long satia, bad la u mut ban leh kano kano ka kam ruh bijai ei ka pyrkhat jong u, namar ba jop u Buhteng haduh ha kaba khatduh iawai u la kylla 'riewkai noh lane nongtuh nongshohnoh U Buhteng pat u la jop ia kiba bun ha kane ka rukom jingpynshoi jong u (la shisha don kiba um lah ban jop), u la kylla 'Suid lamiap, bad um ju paw shuh ha ka dur u, briew hynrei u shu leit pynshoi pynshad ia man u briew, ka briew da ki ktien bang ktien thiang ba kin buhteng ia kiei kiei baroh U Tharai um ju thait ka mut dur; katba u Buhteng pat u ei u nongtuh ia ka por

Ki Jingkylli:

1. *Mano ba la pynwit ia ka jingpule had jingtrei jingktah u Tharai?*
2. *Kiei ki buit u Buhteng ban tuh ia ka por u Tharai haduh ba u Tharai u la kylla riewkai?*
3. *Phi ioh jinghikai aiu na kane ka lynnong?*

.....

LYNNONG XXII

KA BEH DNGIEM

Ka dngiem ka long ka mrad kaba ngim ju tieng ha shnong jong ngi. Kane ka dngiem ka shait pynjulor ia ki jingthung jingtep jong ngi. Wei la poi ma ka ym sah phan sah shriew, bad ka khlong naduh dyngkhong. Haba kam ioh bam ka bam da ki dkhiew. Kan tang lap skum dkhiew hangno hangno, kan khlong da khlong ha ban da long thliew

Ka shait juh eh ban shong ha ki krem synrang maw. Hangta ka kha ka long Ban leit kum poi shajan ki khun, kan tang lap kan bam im Ka long ruh kaba dohsatar.

Shisien ka wan bam phan ha shnong jong ngi Ngi tang shu tip ngi iabeh baroh shishnong. Ki kynthei jong ngi ki rah da ki waitbnoh bad shynrang pat la ki sum. Ngi beh ia ka bad ka kynhoi bad kam banse ban phet sha la krem.

Ngim ju tieng ba kan kem ne kynrup ia ngi. Ka tang la wan sha ki rangbah ki pynap da u sum na ka shadem hamar ba ka ieng rahe rahe bad kam leh ei ei.

Ki kynthei pat ki shoh da ka khmut waitbnoh na ka shata khmut bad ka kyrngah ngang ngang ka khlieh bad ka jlew pang artad Ka dngiem kam ju lah leh ei ei lada ioh ban tied na ka khmut jong ka

Nangta da kaba iaibeh ka phet shapoh krem Hynrei hangta ruh ngim ai jem Ngi sliew da ka ding kaba heh ha khmut krem ngi sa pyaw ne pyoh da u sohmynten bad sa kaweh da ka trap ia ka tдем sohmynten shapoh krem Tang shiphang kata ka synriah jhia-shi-jhia, atshi-shi-atshi Kan ialeh ban rieh katba lah Hynrei khatduh khatwai kan mih bad sa leh ia ka katba mon

Haba dei ba dei ka her iap nangta bad wat lada pei lut ki snier ruh kan her lamwir bad kan nang bthat la ki snier bad bam iaiaid ia la ki snier katba ka nang phet Kaba kum kata ka long ka dngiem bad ngim ju pyllait suk ia ka

N B. - Kane ka rukom ki shait leh ha ki thait Nongspung, Mawiang bad Khatsawphra

Ki Jingkylli:

1. *Ka dngiem ka long ka mrad kaba kumma?*
2. *Kumno ki briew ki ju leh haba ki leihbeh dngiem ha ki por ba kham mynshirwa?*

.....

LYNNONG XXIII

I MISS FLORENCE NIGHTINGALE

Ngan iathuh mynta shaphang iwei i kynthei iba
la pynkyntiew ia ka kam sumar nongpang sha ka
kyrdan kaba donburom Ita i kynthei i dei i Miss
Florence Nightingale

La kha ia i ha ka nongbah Florence kaba ha Italy
ha ka snem 1820 Ki kmie ki kpa jong i ki dei na
England, bad khyndiat por hadien ba la kha ia i ki la
leit shong shata ba ki don la ka jong ka iing Kum i khynnah
rit i la ju sngewbha eh ia ki khunbynriew, bad i la ju pynlong
ia kita ki khunbynriew jong i kum kiba pang, i da sumar
bha ia ki, bad teng teng i pynlong ia ki kiba kheiñkti
kheiñkjat. bad i teh ia spain ia ki ha ka rukom kaba
itynnad bad ibit eh

I Florence i la long iba sbun ia ki mrad ba ri ha iing
ruh Shisien i la iakynduh ha lynti ia uwei u tymmen
nongapblang uba ialam ia uwei u ksew ba la mong, ba
la shoh beiñ da ki khynnah runar. Uta u nongapblang u
la mut ban pyniap noh ia uta u ksew ban pyllait ia u na
ka jingshitom. I Florence i la pan ia uta u ksew na u
tymmen ba in sumar pynkoit ia u. U tymmen u la ai. Da

ka jingsumar basbun jong, i uta u ksew u la koit pat Uta
u tymmen u la kmen eh

I Florence naduh ba i dang khynnah hi i la ju sngewbha
ban leit khmih ia kiba pang sha ki iing jong ki bad ha ki hospi-
tal ruh I la ju shitom jingmut shibun eh haba i la ioh i khamtain
ia ki nongsumar pang kynthai (lane ki Nurse) ba ki bieje eh,
bad ba ki leh tohmet ia ki nongpang Ki nurse ha kita ki por ki
long kiba khlem ioh jinghikai ei ei ha ka kam sumar pang, bad
kim ju leh ei ei ruh ban pynsuk ia ki nongpang Ki hospital ruh
ki long kiba jakhlia bad bunsien eh ki nurse ruh ki long kumjuh.
I Miss Florence Nightingale i la ioh lad ban leit jingleit sha ri
France, Germany, Italy ban leit jngoh kai ia ki Hospital. Ha
kita ki ri i shem ba kiei kiei ki khambha shikatdei ban ia kaba
long ha ri Bilat.

Haba i Miss Nightingale i la dap 29 snem ka rta, i la ioh
lad ban leit shongskul ha ka kam Nurse ha Germany. I la
pynlut tang khyndiat bnai hangta bad i la wan phai sha la shnong
ban iarap ia ki nongpang kiba duk kiba ha ka shnong jong i
bad ki nongrit kiba marjan. Hadien katto katne por i la leit
sha ka nongbah London ban iarap ia ki Hospital kiba sumar
ei ia ki nongpang.

Hamar kita ki por la khie ka thma Crimea
hapteng ka England bad ka France ha kawei ka liang

bad ka Russia pat ha kawei pat ka liang La don ka jingshad kmen kaba khraw ha ri Bilat haba la jop ia ki Russia ha madan thma Alma, hynrei haba la poi ka khubor shaphang ka jingshahshitom ki shipai na ki jingpang bad ki jingmysaw hadien ka thma la pyndum ngain ia ka ri baroh kawei.

Haba la iohsngew shaphang kaba kat kata ka sat, i Miss Florence Nightingale i la tyirwa mon sngewbha ia lade ban leit trei ia ka kam sumar nongpang ha ka Hospital kaba don ha ka nongbah Scutary hapoh dewlynnong Crimea Ka Sorkar Bilat ka la pdiang ia ka jingtyrwa jong i da kaba shadkmen La thung Superintendent ia i halor laiphewphra ngut ki nurse ki ban ialeit ryngkat bad i ban trei ha ka Hospital kaba hangta ha Scutary

Haba ki nongthiah pang ha Scutary ki la iohsngew shaphang kane ka khubor kim ngeit ba ka lah ban long Hynrei i Miss Nightingale i la poi biang biang ha ka hospital I tang shu la poi, i la kyrngah khlieh haba i la iohi ia ka jingjakhlia, ka jingjynjar ki nongpang bad ka jingkynrum kynram ka bym don thylliej ban iathuh. Ha ki baranda bad ki lynti iaid hapoh Hospital ki iathiah lang kiba mynsaw ha la ki riam shipai, bad ki jaiñ ba bit snam ba la tyrkhong bad dambit ha ka doh. Ki jingthiah ki long kiba bit jakhlia ba iathiah iadem lang bad

briew bad khnai bad jynreiñ bad simad bad jaid dkhiew
 laiphew ka jait I Miss Nightingale bad la ka jong ka kynhun
 ki nurse, haba ki la iohi ia ka jinglong kaba kum kane, ki la
 klet ia ka jingthait jingjrem hadien ka lynti kaba jngai ba ki la
 iaid. Ki la sdang shisyndon ban trei ia ka kam Ka kam kaba
 nyngkong ba ki la sdang ban trei ka long ban shna ka iingshetja,
 ban khreh jingbam ia ki nongpang, bad ka jaka sait ban
 pynkhuid ia ki jaiñ ki nep ban pyniap bad pynduh ia ki
 kynja jait khñiang baroh I Miss Nightingale i la jop ia ki
 nongsumar pang shynrang ban pynkohnguh ia ki ba kin shakri
 da kaba iai shah bad kaba minot Namar ka jingkitkhia
 bad ka jingtreishitom jong i, baroh ki nongtrei lem bad i kim
 nang ban shong alhia Hangno hangno ba poi i Miss
 Nightingale, ki nongpang ba la jan iap ki sngewpeitmat
 kdar

Ka la jia te hadien ba i la trei hynriew bnai hapoh
 Hospital bad kumjuh ruh ha ki jaka sumar nongpang ha
 madan thma, i la kem pang da ka khieshoh kaba jur Ki
 doktor ki la pyrkhata ba in ym lah im shuh, hynrei katno
 ka jingkmien ka la long haba la iohsngew ba i la
 nangkham shait Hamar kita ki bnai ka thma ka la kut,
 hadien ba ki Phareng bad ki French ki la jop ia ka
 nongbah Sebastopol La ong ba i Miss Nightingale in
 leit phai noh sha ri Bilat, hynrei im treh satia namar
 dang don bun spah ki shipai kiba pang bad mynsaw ki

bym pat bit satia ban kit ia ki sha la ka ri i la trei
 shitom shuh shuh na ka bynta ban pynsuk ia ki shipai da kaba
 plie ia ki Library bad ki jaka pule kot na ka bynta jong

Na man la ki dong i la ioh jingiaroh bad jingpyrto U
 Sultan ka Turkey u la ai sngewbha ia i ka khadu mawkordor,
 ka Syiem Victoria ka la ai sngewbha uwei u mawkordor ba la
 mutdur da u Khunsiem Albert La kren iaroh shaphang jong
 i ha ka dorbar Parliament Ka Sorkar ka la tyrwa ban leh
 burom ia i ba in leit phai sha la ka ri ha kawei ka jhad thma,
 hynrei i la kyrngah bad i la leit phai jar jar i da shim ia ka
 kyrteng sin i Miss Smith, khnang ba ki briew kin ym ithuh ia i
 Haba i la poi sha la iing i la ia id kiar ia ka tyngkong, i la leit
 rung na kyrpong iing Hadian shitaiew ne, bun ki paidbah ki la
 ialang ban pdiang sngewbha ia i, hynrei im treh satia ban pdiang
 ia kano kano ka jingai khublei paidbah

Ka ri Bilat ka la leh burom ia i da kaba seng kawei ka
 Phon ha ka kyrteng jong i ban pyntbit ia kiba trei kam nurse,
 bad ha kaba sdang kata ka phon ka la heh palat ia ka hynñiew
 lak tyngka

Ki Jingkylli:

*1. Hangno bad mynno la kha ia i Miss Florence
 Nightingale?*

2. Kaei ka kam ba i Miss Florence Nightingale i ju
sngewtynnad han leh naduh ba i dang khyimah?

3. Kaei ka kyteng ba i Miss Florence Nightingale i
la shim shipor mynba i la wan phai sha la ka ri na la ka
jingtrei jong i? Balei i la leh kumta?

4. Thoh lyngkot katha phi tip shaphang ka jingim
had jingtrei i Miss Florence Nightingale?

5. Kumno ka ri Bilat ka la leh burom ia i Miss
Florence Nightingale?

.....


LYNNONG XXIV


U KYLLANG BAD SYMPER

UKYLLANG u long u lum mawsiang uba ieng ha kawei
ka madan ha ki thain Khadsawphra hajan ka shnong
Rymmang, bad u don tang kumba lai mail na Nongrum.

U SYMPER u long u lum uba ieng ha kawei pat ka
madan ha ki thain Maharam, hajan ka shnong Kmawan bad
ka Mawlyngnu. U don tang kumba ar mail na ka surok
Mawphlang Mawsynram

Kine ki lum baroh arylli ki long kiba itynnad tam hapdeng
baroh ki lum ha Ri Khasi Jaintia.





Ki tymmen Khasi mynhyndai ki la ju tharai ba don ki blei ha kine ki lum baroh ar Ki kyrteng kita ki blei ki long u Kyllang bad u Symper Don kiba tharai ba kine baroh amgut ki ialong shipara, hynrei kiwei pat ki ong ba ki shu iadei shilok La kumno kumno, baroh amgut ki ju ialeit iawan kai sngewbha uwei sha uwei pat

Ka jingiathuhkhana pateng ka ong ba shisien kine ki blei ki la iakajia aiu re. U khun bynriew um lah ban tip thikna ia ka daw jingiakajia kine ki blei, namar ki long sha lyndet, ba ka khmat jong u kam lah ban iohi bad ka shkor kam lah ban iohsngew. Ka hamsaia kaba la poi ha ka jingtip u khunbynriew shaphang ka daw jingiakajia jong ki, ka long ha kane ka rukom-

Kine ki blei ki la ialehkai sngewtynnad ha kawei ka por Katba ki dang ialehkai ki la sdang ban iapynpaw la ka jong ka jong ka jingktilaiñ bad ka jingstad. Katba nang slem kata ka jingialehkai, ki la poi sha kaba ki iashongshit. Hadien hadien, na kaba iashongshit ki la poi sha kaba ialeh shisha, haduh ba ki la iabitar bym lah ong shuh. Haba kim lah ia jem shuh katno katno ruh ki la sdang ban ialeh da ka bor U Symper u la shat ia u Kyllang da ka ktieh, da kaba thew ban tyilep noh ia u hapoh khyndew, bad u Kyllang pat u la kawang ia u Symper da ki maw. U Symper u la khat da ka ktieh da medan haduh ba sawdong jong u sah lajan u mawalang

suda. U Kyllang pat u la khoh la kbong lut ia ki maw na trai jong u katba dang lah ban ioh, bad haba la lap ba tap ktieh noh, u la pied ia ki maw syrtap na la krung bad ka skhep, haduh ba u la sah sa tang u maw dohnud tylli mlun.

Ka jingialeh jong ki ka la neli siem jlang, haduh ba u khun bynriew u la shykhei rem ban sngap ia ka jinglynguh ka khyndew na ka jingiakyruh bad jingiabyrthen jong ki, bad ban peit ia ka tдем bad pui pui kiba mih na kata ka jingialeh.

Hadien ka jingialeh kaba la lko pom, u Symper u la mong bad mynsaw jur ka khlieh bad ka krung haduh ba u la hap dem ngon ha khmat u Kyllang. U Symper u la dem pynrit khop ia lade katba u Kyllang pat u la ieng pynat shadem kum u sing uba ieng leh kob bad leh jop, u da peit dom la ka khmat sha ka phang u Symper.

Ia kine ki dak ki shin, lah ban dang shem haduh mynta. Ha trai lum Kyllang niar eh ba kin don ki maw, ka don tang ka dew ktieh kaba iong bad kaba sboh bha ha kaba ki man kyrhai ki dieng ki siej ha ki them ranab lum jong baroh sawdong. Ha kjat lum jong u Symper ki dap tang da ki maw suda, ka khyndew ruh ka long kaba stang halor u mawshyiap, bad ka long ka bym bit shuh ia ka rep ka riang. U Kyllang u long u mawsiang ba tylli mlun, hynrei u Symper pat i kum u mrad uba dem,

namar ka kliar jong u kaba shaphang shatei ka la twa
 bad namarkata, ka la kham lyngkot Ha ka krung u
 Symper kaba shaphang sepngi ki don haduh mynta, ym
 duna lai tylli ki thliw krem kiba heh, kawei na ki ka
 long kum ka kamra kaba heh kaba biang ban rieh slap
 kumba 400 ngut ki briew

Ki Jingkylli:

*1. Iathuh lyngkot balei ba ha trai lum Kyllang ym ju
 kham don maw, katba ha kjat jong u lum Symper pat
 dap tang da ki maw suda.*

*2. Don aiu ha ka krung u Symper kaba shaphang
 sepngi?*

.....

LYNNONG XXV

KA JINGWAN KA PYREM

- 1 Ka tlang ba pjah ka la leit noh,
 Ki lyoh dum thah ka suiñ la lait,
 Ka pyrhut khriat kam donbor shuh,
 La wan ka pyrem syaid.

2. Ki jymgam khrek ki lum baiong
 Ki khlaw ki sei ki sla ba im;
 Da jaiñkup thymmai la pynphong,
 Ha pyrthei bym lah rim.

3. Ki them, ki madan, ki phuhmat
 Da u phlang jyrngam bad ki jhur,
 Ki lyngkha ki ap i' u nongbet,
 Ki ong la jan ka por.

4. Ah katno jingbha jong U Blei,
 Ba khyndew jong ngi u wan jngoh,
 Ka lyiur, ka tlang, ka pyrem de,
 Ki dak jingieit baroh.

Ki Jingkylli:

1. Thoh na la ka jingkyrmaw ia baroh saw tylli ki dkhoh na ka jingrwai "Ka Jingwan Ka Pyrem", da buh bad ki dak sangeh (punctuation marks) kiba dei.

2. Kiei ki dak jong ka jingwan ka por pyrem?

.....

LYNNONG XXVI

KA PUKNI, KA MIAW BAD KA SNIANG

Ha klier uwei u dieng, ka pukni ka la thaw la ka skum; ha ka thliaw kaba hapteng ka la shong ka miaw khlaw; bad ha ka krem kaba ha trai dieng ka la shong ka niangkhlaw bad la ki khun. Hāngta ki iashōng suī

paramarjan, bad lynda pynsniew kata ka miaw ba sianti da ka jingkren siar jong ka, ki la iashong suk kumta. Ka kren kumno? Nyngkong, ka leit kiew mian mian sha kata ka pukni, bad ka la ong, "Ko lok ba ieit, ngi la iap noh baroh; ka thie ka sniang kaba jakhlia kam ju leh ei ei baroh shisngi hynrei tang ban dait ia ki thied jong une u dieng bad nga shu suba ba ka leh kumta, khnang ba, kan ioh lad ban poi sha ki khun jong ngi keifi. Nga hynrei ngan khmih bha ia la ki jong haba nga shong ha iing baroh shibnai. Ym bit kumta lok?" Nangta ka pukni ka la sheptieng her Kata ka miaw, ka tang shu mih na skum ka pukni, ka leit hiar sha krem kata ka sniang ha trai uta u dieng, bad ka la leh mynleh shgewsih shibun, bad ka la ong, "Nga tharai ba phim shlan ban leit jingleit mynta mo?" Ngam leit balei ong ka sniang. "Niunia," ong ka miaw, "Kata katba phi mon hynrei nga la lap iohsngew ba katei ka pukni ka la ong ia la ki khun, ba kan pynkhawai ia ki da ki sniang, bad ka shu ap ban iohi ia phi ba phi leit jingleit. Ioh ka leit tuh kawei na ki khun jong nga haba ngam don ha iing, ngan leit noh ho." Kumta kata ka miaw da kaba shu par tuh mynmiet mynmiet ban leit wad jingbam, bad ba ka shu leh mynleh shong ap baroh shisngi ha thliew, kum kaba sheptieng eh, ka la pynkhiuh ia ka pukni, bad ia ka sniang haduh ba kim nud ban leit jingleit shano shano ruh. Namarkata, ynda khyndiat sngi ki la iap thngan, bad pukni bad sniang, bad ki khun jong

ki baroh; bad kata ka miaw bad ki khun jong ka ki ioh bam doh ia ki.

Ka Jingsneng:- Ko lok, wat ju sngap ia ka jingsaham ki paramarjan ba sianti, kine kiba kren siar ki pyniatu ia u tnga bad ka tnga, ia ka kmie bad ki khun, bad lada ioh kin wiang ding ia ka pyrthei.

Ki Jingkylli:

1. Mano ba la pynsniew ia ka jingiashong suk hapteng ka pukni, ka miaw bad ka sniang?

2. Balei ka sniang bad ka pukni ryngkat bad la ki khun ki shu iap ei?

.....
LYNNONG XXVII

KI PURISKAM LUSHAI

I. U PUPAWLA

Don ka puriskam ki Lushai shaphang uwei u briew uba kyrting u Pupawla. Une u ap ia ka lynti sha, ka shnong kaba iap, u da bat la ka ryntieh bad u khnam. Kat kiba iap ki dei ban ia id na ka jaka shong jong u; la kin sdang ia id kiar da kumno kumno ruh, ha kaba

khadduh kin shu dei iaid hi na iing jong u. U siat ia ki; hynrei ia kiba nang behmrاد haba ki dangim, ia kita u pyllait. Kumjuh u pyllait ia kiba ju thaw jingkhawai Lada u mut ban siat ia u khynnah u un iasaid bad un ong, "Kumno phi tip ba lada nga im ngan ym long uba nang behmrاد bad ba ngan ym thaw jingkhawai?". Te u Pupawla u pyllait ia u khynnah ynda u la iohsngew ia kane ka nia. Ia ka jaka ba iashem lang ki surok ki ju pyniasyriem kum u Pupawla.

II. KA PUNG RI

Shaphang mihngi ka ri Lushai hajan Champhai don ka pung ba ki khot ka Pung Ri. Ki Lushai ki ong ba ki riawiap ki dei ban iaid na ka haba ki leit ha shnong kiba iap. Ki tip ia kata ruh namar shisien ki briew ki leit iabeh mrاد sha kata ka liang katba ki dang sha khlaw kumta, ka tnga jong uwei na ki ka la iap, bad hamar ba ka la poi ha ka Pung Ri ka pyrta ia la u tnga, ka ong, "Ym don briew ha iing ban sumar ia ki khun. Phin shem khyndiat ki dohkha ba la shet halor tyngier." Uwei na kita ki nongbehmrاد u la sngewthuh ba dei ki ktien ka tnga jong u. U la sngewkhuslai shibun, u la leit wan noh sha la iing, bad u la shem ba ka tnga jong u ka la iap, bad ia ki dohkha kumba ka la ong.

III. "HRING-LANG-TLANG"

Haba u Lushai u iap ki ong ba u leit sha ka shnong ki riowiap. Hamar lynti shata ki ong ba u don u lum na uba u lah ban iohi ia kiba im. U sngewkhuslai shibun na ka bynta kiba dang sah hadien. Kumta kita kiba la poi shwa ha kata ka shnong, ki wan ai um ia u ba un dih, khnang ba un klet noh ia kiba im. Bad ki pyntynsat syntiew ha ka shkor ba un ym kyrtiang dien shuh. Kumta u sa suk ha la ka shnong thymmai.

Ki Jingkylli:

1. Iathukkhana lyngkot shaphang —

(a) U Pupawla.

(b) Ka Pung Ri.

(k) Hring-Lang-Tlang.

.....

LYNNONG XXVIII

KA JINGSUMAR SUKHER U BLEI IA NGI

1. Ha khmih sim bneng ki her ha suiñ,
 Kim bet, kim ot, ne lum ha thiar;
 Hynrei U Kpa Uba ha bneng,
 Ia ki U bsa U iai sumar

2. Ha khmih ki 'tiew lyngkha ki phuh,
 Kim thir shitom lane kim thaiñ;
 Hynrei u Solomon ba stad,
 Tang kum uwei um lah kup jaiñ.

3. Iada U Blei U iai sumar,
 I'u phlang lyngkha ba mih hajuh;
 Mynta u phuh lashai la bret,
 Un iai sumar ia phi kumjuh.

4. To wad shuwa Hima U Blei,
 Bad ia ka hok jong U artad;
 Te ia kiei kiei baroh,
 Yn sa ai tam ha phi bun wat.

Ki Jingkylli:

1. Mano ba iai sumar bad pyndap pynhiang ia ki jingdonkam jong ngi?

2. Batai katkum na ka jingsngewthuh jong phi ia ka dkhot kaba saw.

3. Thoh na la ka jingkyrmaw ia baroh saw tylli ki dkhot na ka jingrwai "Ka Jingsumar Sukher U Blei ia ngi" da huh de bad ki dak sangeh (punctuation marks) kiba dei.

.....

LYNNONG XXIX

KA SYNDUK KSIAR

Shisien ha kawei ka por la don uwei u nongthohdieng uba duk shisha eh, bad ka kmie jong u ruh ka la iap Une u la im da kaba trei shitom ban leit thoh dieng man la ka sngi ban leit die ha iew, ban ioh bsa ia lade bad ia la ki khun rit.

Te ha kawei ka sngi katba u dang leit thohdieng ha iwei i lawbniap, hamar shiteng sngi, u la thait ym don pyrthei shuh na ka jingthang jong ka sngi, kumta u la leit ban riehn gen ha trai jong uwei u diengsning uba heh, bad namar ka jingpyngngad ka jingbeh hir hir jong ka 'er sepngi, u la iohthiah lyngngai

Te hamar ka por shiteng synñia u la kyndit na kaba iohthiah bad ynda u la peit sawdong jong u, u shem pynban

ba dei hapoh khlaw. Hangta u la pisa jingmut eh shaphang la ki khun rit ba lehse ki la iap thngan Hangta u la ieng shisyndon bad u la ong, "Ngan leit sha la ki khun, bad lada ki la iap, ngan pyiniap noh sa ialade ruh."

Hynrei shwa ba an leit noh, ki la wan mih na shadien jong u lai ngut ki thet samia kiba bhabriew sat bad kiba la riam tang da ki jaiñ lieh su la bad kiba ka khmat jong ki ka phymai kum ka jingphalang? "Bat sngi ha ka iit Kine ki dei kita keiñ ki puri laingut."

Katba une u nongthohdieng u dang peit lyngngoh ia ki, ki la wan shajan jong u bad kata ka hynmen jong ki ka la kylli ia u kumne, "Ko Bah, phi wan donkam aiu shane la katta por?" Te u la jubab da kaba iathuh ia ka jingshem lanot jong u baroh bad shaphang ka jingtrei shitom jong u ruh.

Hangta kata kaba ar pat ka la ong ia u, "Ko Bah, lada phim shym la iathuh ruh ngi la tip hi ia kata baroh Ia ki khun rit jong phi ruh wat khulai ei ei naba ngi la wan sumar hi ma ngi hynne baroh shimiet."

Namar kane ka jingsbun jong ki, une u nongthohdieng u la dem ngon ha ka khyndew kum ka dak dan pyini ia ka jingngewnguh jong u ia ki. Hynrei kata ka para khadun jong ki ka la ong kumne:

“Hakhmih, ko Bah, ngi dei kita keiñ ki puri laingut shipara. Te mynta ngi wan ban pyllait ia phi na ki jingshem jynjar jong phi baroh ha kane ka pyrthei ”

Ka tang shu la kren, u la wan mih sa uwei pat u samla uba bhabriew kum ma ki hi, u da rah ruh ha ka kti jong u ia kawei ka synduk kaba la thaw tang da ka ksiar ba nylla suda. Kata ka hynmen jong ki ka la ong, “Ko Bah, une u dei uta keiñ u shakri jong ngi bad kane ka synduk ka long kata keiñ ka jingiarap kaba ngi wan ban ai ha phi.”

Kata kaba ar pat ka la ong, “Ngan ai ia phi ko bah, saw tylli ki jingsneng kiba kongsan eh, bad to da sumar ba phin ym bakla lane klet ia ki. Kita ki long kine:-

(1) Phi dei ban long uba sngewrit bad uba burom ia kiwei.

(2) Phi dei ban long uba ieit bad uba jemnud.

(3) Phi dei ban long uba da pyrkhata bha shurwa ba phin leh ia kiei kiei baroh.

(4) Phim dei ban iathuh ia kine kiei kiei hano hano ruh.

Lada phi baka ia kine, phi sa phi bang uba sedang jong ka jingim jong phi.”

Kata kaba lai pat ka la ong, "Shim ia kane ka synduk ksiar, to rah bad to da sumar bha khop ia ka ban ym don mano mano ruh ba ioh ia ka. Hakhmih ma phi ruh phi ei ban plie tang shisien lai bnai. Te phin lap hapoh jong ka ba don artylli ki mawkordor kiba rem bha." Kumta u la kylla long uba riewspah hadien katto katne por, bad u la imsuk imsaif kyrhai. Kita ki khun jong u ruh, da ka jingsumar bad ka jingiarap kita ki puri, ki la nang san ha ka ryenieng bad ka jingbhabriew haduh ba ki la long kiba bhabriew tam eh ha kata ka por.

Uta u syiem, hamar ba uta u nongthohdieng u wan die ia kita ki mawkordor, u ju peit bad pyrkhat lyngngoh, nangno u ioh ia kine. Khatduh eh u la kylli ba u la ioh nangno bad mano ba la ai ia ki ha u. Te u nongthohdieng uba biët u la iathuh ba la ai ia u da kita ki puri.

Mynta une u nongthohdieng u la klet noh ia ki jingsneng jong ki puri, bad namar ba la iar ka pud ka sam, u la sngewsarong ia lade. Te ha ka jaka ban long uba suk shirta, u la dei ban duh noh ia baroh kaba u la don.

Ha kawei ka sngi, katba u dang iaidkai ha kawei na ki kper soh jong u, kine ki puri ki la wan ban iakynduh biang ia u. U tang shu iohi ia ki, u la kynmaw ba u la lyndet ia ka jingsneng jong ki. Te u la iam sngewsih

kthang eh bad u la kyrpad jur ia ki ba kin shah ia u ban kylla kaba mut. Hynrei ka hynmen jong ki ka la ong kumne: "Koit Bah, ngi la leh bha ia phi haduh katta katta, hynri phi hi phi la pynlong ia lade ban duh noh ia kine kiei kiei kiba ngi la ai ha phi mynshuwa."

Kaba ar pat ka la ong, "Ngi la ai ia phi ki jingsneng kiba biang hynrei phim suidñiew ia ki, kumta phim don hok ban long uba suk uba saiñ shirta."

Kata kaba khatduh pat ka la ong, "Hakhmih mynta, ia kiei kiei kiba phi don mynta yn shim duh noh, bad phin sah ha kajuh ka jinglong kumba mynshuwa " Kumta ki la jah noh na u Ynda u la leit phai sha la iing, u la iam kthang eh ia la ka nusib hynrei ym don lad shuh

Te ia ka iing paki dulan jong u la pynkylla iingtrep noh bad ia ki mar ki mata jong u ruh la shim noh

Ki khun jong u ruh mynta ki la kylla long kiba sniewbriew kumba mynshuwa. Hangta une u khun ka bieit bad ka sarong u la dei ban im biang kum u nongthohdieng ban ioh bsa ia lade bad ia la ki khun. Da kumne keiñ la pynkut noh ia ka jingim jong u.

Jingsneng:- Ka jingsngewrit, ka jingleh hok, ki jingleh adkar bad ka jingjemnud ki lam sha ka kyrdan

bad ka burom jong ka jingim; hynrei ka jingsarong ka lam sha ka jingshitom bad ka jingjot.

Ki Jingkylli:

1. Iano u nongthohdieng uha duk u la iakynduh ha kawei ka miet hapoh khlaw?

2. Kiei ki saw tylli ki jingsneng kiba kongsan kiba ka puri kaba ar ka la bthah ia uta u nongthohdieng baduk ban sumar bha?

3. Aiu ka puri kaba lai ka la ar ha uta u nongthohdieng?

4. Jia aiu ia uta u nongthohdieng ha kaba khatduh? Balei?

.....

LYNNONG XXX

KA SULTANA REZIA

U Sultan Altamsh na ka jait syiem Mraw u la don shibun ki khun shynrang bad kawei ka khun kynthai kaba kyrteng ka Rezia. Kine ki khunsyiem baroh ki long ki bymlarkam, hynrei ka Rezia ka la long kaba shalak bad stad naduh ba ka dang rit. Kumta u kpa u ieit shibun eh ia ka. Hynrei ka la pynlyngngoh ia u mano ban kiew ha ka khet jong u ynda u la iap. U la tip ba kam ju

dei ka rukom ia ka kynthei ba kan synshar kum ka syiem ha ka hima La katta ruh u la hikai ia ka bun kiei kiei naduh ba ka dangrit ia kaba u khunsyiem u dei ban tip

Uju pynbud ia ka kat shaba u leit. U shait leit behmrad ryngkat ryngkat bad ka Haba don kiba ieng ialeh pyrshah ia u, u ju pyndem ia ki haba ka don lem bad u Nalorkata, u hikai ia ka ban nang shong kulai U hikai ruh ban nang bat ryntieh bad siat khnam U pynmlen ia ka ban nang ban kalain wait bad sum da u sum U hikai ruh bun ki jingstad ha ka kot ka sla U hikai shaphang kumno ban synshar hima U ai jingstad ia ka, ia ka rukom im jong kiwei ki ri bad ka jingstad saians

Ha ka jingthiah iap jong u, u la khot la ki myntri korbar ri hajan jong u U la kren ha ki ba kin thung syiem da ka Rezia ha ka jaka jong u. Ki la shu sngap la ka sngap Kim nud ang shikyntien ruh Hynrei u la sngewthuh ia ka jingbymmon jong ki ban bud ia ka jingbthah jong u

Ynda u la iap ki myntri korbar ri ki la buh ha ka khet da u Ruknuddin uwei na ki khunsyiem. Une u Ruknuddin um nang satia ban synshar. Ha ka jaka kata, u la pynlut la ki sngi ki por ha ka jingleh sngewbha bad tamasa. U la lehmon bad pyniap

ishyrkhei ia kat kiba u sngewdei ban pyniap. Kane ka la pynsyier mynsiem wat ia ka Rezia ruh. Ha kano ma ka khyllipmat u lah eh ban phah pyniap ia ka de; kumta ka Rezia ba sian ka la thawbuit.

Man ka Sngi Thohdieng ki paid Musulman ki shait leit dem ban duwai ha ka lingmane Bah kaba hapoh Delhi. Ha kawei ka sngi Thohdieng ki tang shu dep, ka Rezia ka la kiew ban kren nador rynsan. Ka tang shu sdang kren u paid nongduwai u la phai khmat lut sha ka. Ki la sngewieit ia ka jingsawa sur thiang jong ka. Baroh ki la ju ithuh ia ka. Ki la shahshkor kyndiang sha ka.

Ka tang shu kut ka jingken, u paid nongduwai baroh u la mareh sha iingsyiem. Ki la kem ia u Ruknuddin, ki la set patok ia u bad buh pli da ka Rezia ha ka khet. Shipor ki jingkhieh kulmar ki la jem jai. Hynrei bun na ki rangbah syiem kiba don shajngai kim kohnguh syiem ia ka. Don napdeng jong ki kiba ialeh pyrshah ia ka. Ka la donkam ban ialam ia ka kynhun shipai pyrshah ia ki.

Ka la long kaba shyrkhei ia kiba ialeh pyrshah ia ka. Hynrei ka la leh kmie ia kat kiba ieit bad niewkor ia ka. Haba ka shong bishar ha ka khet syiem ka phong da ki jaiñ syiem bad ka jainphong ha ka khlieh jong ka.

Ka bishar hok ia la ki raiot bad ai jingsneng ia kiba leh bakla.

Ha kawei ka por ka la leit ban pyndem ia u Altunia uba ialeh pyrshah ia ka. Don na ki nongbud jong ka kiba shetkylla ia ka. Ki la kem ia ka ban leit lam ia ka sha u Altunia. Ki la pynkiew khet pat da u Bahram, u parə arkmie jōng ka. Hadien hadien ka la iasoh lok bad u Altunia ban wan hiar thma ia u Bahram. Hynrei ki la shah jop. Ki la phet iap na madan thma, hynrei la kem im bad pyniap ia ki baroh arngut.

Ki Jingkylli:

1. *Uei n kpa jong ka Sultana Rezia?*
2. *Ia'ihukhana lyngkot shaphang ka Sultana Rezia katkum na kane ka lymong ba phi pule.*

.....

LYNNONG XXXI

KA JINGPYNJAH THNGAN

1. Phim ju peit thuh kumno u ngap
 U phet kylleng kylleng?
 La lut ka um syntiew b'u kjap,
 B'un kit sha iing b'u seng.

2. U sing tymmen ba shong ha krem,
U kyrhuh hu-shi-hu;
U khlem da wad, un shu ioh jem,
Ka bam kan wan, ru ru?
3. Tyngab ba khie dangstep phymgab,
Dang saw ha shkor ka pah.
Te phi tharai jingpah ab ab,
Jingthngan kan lah pynjah?
4. Myrsiang ba thiah jaipdeh mynsngi,
Phi mut un ioh kem syiar?
Ym dei b'u shang lapmiet khlem sngi
Hapoh kynjah jar jar?
5. Hato kam dei te ka jingong,
Ka ktien ba kren tymmen,
"U maw tyllun ba shong kynrong,
Um lah lang sohpaillen"?

Ki Jingkylli:

1. *Thoh na la ka jingkyrmaw ia baroh san tylli ki dkhoh na ka jingrwai "Ka Jingpynjah Thngan". Da buh ia ki dak sangeh (punctuation marks) kiba dei.*

2. *Kumno ki jingthaw bapher ki lah han ioh la ka bam? Aiu kane ka hikai ia ngi?*

.....

LYNNONG XXXII

U NONG-SAMARIA UBA BHA

U Jisu U la iathuh bad U la ong, "Doñ uwei u brierw uba leit jingleit na Jerusalem sha Jerikho, bad u la hap hapdeng ki nongtuh kiba haba ki la pynlyngkhuid ia u, bad ki la shon ia u, ki la leit noh, ki da iehnoh ia u kum uba la iap. Te uwei u lyngdoh da kaba jia ryngkhat u la wan hiar na kata ka lynti, bad haba u la iohi ia u u la iaïd kiar noh sharud lynti. Kumjuh ruh de uwei u jaït Lebi, haba u la poi sha kata ka jaka, bad haba u la iohi ia u, u la kiar noh sharud lynti.

Hynrei uwei u kynja Samaria, katba u dang leitjingleit, u la poi haduh ha u; te haba u la iohi ia u, u la sngewsynei, bad u la wan ha u, bad u la spaiñ ia ka jingjngem snam jong u, u da theh ha ki ia ka umphniang bad ka waiñ, te u la buh ia u halor u mrad jong u hi, bad u la wallam ia u sha ka iingbasa, bad u la sumar ia u

Te ha kaba lashai, haba un sa leit noh, u la sei noh ar tyngka bad u la ai ha u trai iingbasa, bad u ong ha u, "To sumar ia u; bad kaei kaei ruh ba men pynlut tam, nga, ynda nga wan phai pat, ngan siew pat ia me."

Na kine lai ngut uno, me mut, uba la long paramarjan ia uta uba la hap hapteng ki nongtuh?

Ki Jingkylli:

1. Mano ba la iarap ia uto u briew ba lu hap hapteng ki nongtuh? Aiu uta u nongiarap u la leh?

2. Kiei kito kiba la iohi hynrei kiba la iaiaid kiar noh na uto uba la shah lute ha ki nongtuh?

3. Mano napteng kito lai ngut, phi tharai, ba la leh ia ka kam kaba bha?

.....

LYNNONG XXXIII

U SIVAJI

Ha ka por ka jingsynshar u Akbar bad u Shahjehan la don ki thma kiba jur hapteng ki Mogul bad ki syiem ka Ahmednagar. Ha kine ki thma la don uwei u riw ialethma uba kyrteng u Shahji uba la ialeh na ka liang ka Ahmednagar. Ngin iathuh khyndiat mynta shaphang ka jingshlur u khun jong u.

Ha ka Map India phin iohi ia ki lum ba ki khot ki Western Ghats. Ia ki pynta kiba sawdong jong kine ki

lum ki khot ka Maharashtra. U Shahji u la don katto katne tylli ki bri ki khyndew ha kane ka thain, bad u la don ruh ka khyndew bad kawei ka iing ha Poona. U la don ruh uwei u khun uba kyrteng u Sivaji. U Shahji u la shong ha ka jaka ha kaba u donkam ban trei, hynrei u Sivaji u la shong ha Poona ha kaba la pynsan pynrangbah ia u hapoh ka jingsumar uwei u Brahman. Ka kmie u Sivaji ka kular ia ka blei Siva ba lada ka ioh khun shynrang kan jer kyrteng ia uta u khun ha ka kyrteng jong ka bad tang shu ioh ka la leh kumta, ka la jer ia la u khun, u Sivaji.

U Sivaji um shym da sngewtynnad eh ha ka kam pule kot pule sla. U kparad jong u u la long u riewthma uba pawnam, bad u Sivaji ruh u la kwah ban long uba kum ma u. U la pynlut ia la ka por ha kaba shongkulai, kaba iakalaiñ waitlam bad kaba shrang khlaw hapdeng ki lum bah. U la ialang bha bad ki briew kiba shong hapdeng ki lum bad u la tip lut ia ki lynti khim lyngba jong kine ki lum.

Haba u kpa jong u u la iap, u Sivaji u la ioh bynta ia ka hok u kpa jong u kaba ha Poona. U la don bad u khyndiat ki shipai, bad ryngkat bad kine u la ju hiar thma ban lute ia ki ri kiba marjan. Katba u nangjon u la nang kham shlur kham shlur, haduh ba u la nud ban isleh ia ki shnong jong uwei u syiem uba khraw, kumta ba u syiem

u la pynlong ka jingiateh lok bad u u da ai ia u ia kawei ka jaka kaba ki khot ka District Konkan. Tang kumta hi hadien khyndiat por, u Sivaji u la ioh ban lum ki shipai ialethma haduh 60,000 ngut. Ryngkat bad kane ka kynhun shipai ba khraw. u la sdang ban hiar thma bad lute ia ki Mogul ba khlaiñ bor kiba long ka jingshyrkhei ia baroh ki hima kiba don ha kito ki por. U Patsha Mogul u la phah ia uwei u Jemel uba kyrteng u Shaista Khan pyrshah ia u Sivaji. U Shaista Khan u la ioh knieh ia ka Poona, bad u la shim ia ka iing u Sivaji ban shong ban sah U Sivaji u la sdang ban pyrkhat lad da kumno un ioh pat la ka jong ka iing.

Ha kawei ka miet, haba ki paidbah nongonkurim kiba bun ki dang iarung shapoh shnong Pòona, u Sivaji ryngkat bad 25 ngut na ki nongbud ba shlur tam jong u, ki la iarung lang shapoh ryngkat bad ki Haba ka jingiaid paidbah ka la poi ha syndah ka iing jong u, u Sivaji u la rung kynsan shapoh bad u la pyniap ia u nongapphira Ia u Shaista Khan bad ki lok jong u la pynkyndit bad u Sivaji u la ioh pat la ka jong ka iing. Ia u Shaista Khan, hamar ba u dang phet, la ioh pam pyndkhut lai tylli ki shympriah kti da u Sivaji. U la lait im da kaba ryngkoh lyngba ka jingkhangiit. Ha kata ka por ki briew u Sivaji ki nang lute ia ki iingjaiñ jong ki Mogul.

U Sivaji mynta u la ioh shibun ka jaka bad ka kynhun shipai kaba khraw eh. Ha ka snem 1668, u la pynbna syiem ialade halor ka Maharashtra, bad u la pynlong ia ka Rajgarh, ka nongbah jong u.

U Patsha Mogul u la sngewdiaw shibun haba u la iohsngew shaphang kane. Namar ba kam dei ka kam kaba jem ban pyndem ia u Sivaji, u la thaw da kawei ka buit ban riam ia u. U la khot sngewbha ia u Sivaji ban leit sha Delhi, u da kular ban pynlong ia u u Lat jong ka Dekkan U Sivaji u la leit bad u la iashem bad u Patsha. Ka la jia haba u la rung hapoh nongbah, u Patsha ym shym la leh burom ia u ha dorbar kumba ka la dei ia u ban leh. Mynta, u Sivaji u sngewthuh ba la shukor ia u bad ba ha ka jingshisha u la kylla long u koidi jong u patsha Mogul. La buh ki nongap pahara sawdong ia ka iing ba u shong, hynrei u Sivaji ym tieng ei ei. Ka jingsian jong u ka la pyllait ia u. U la phah noh sha la iing ia baroh ki lok jong u. U Patsha u la pyrkhath ba mynta haba u sah marwei, kan jem shibun ban pynbor ia u ban iasuk bad u.

Ha kawei ka sngi u Sivaji u la pynbtha ba un phur un siang ia la u kpa ba la iap. Ka ju long ka rukom ha ki por kiba kum kita ban thaw ka jingkhawai ia ki Brahman ne ki Lyngdoh. U Sivaji u la pynkhreh kyrhai ka bam ka dih bad u la thep ia ki jingbam ha ki shang

kiba heh ban leit bah sha ki. Ki nongap pahara u Patsha ki la tynjuh ia kita ki shang katto katne tylli bad ki shem tang ki jingbam thiang suda. Ynda la poi ka por premmiet, u Sivaji u la rieh ialade hapoh kawei na ki shang thep jongbam bad u la phah bah shabar ka iing jong u Uwei na ki nongbud jong u u la pynkhreh uwei u kulai na ka bynta jong u shabar shnong. U Sivaji u tang shu lait shabar, u la kiew joit halor uta u kular bad u la march bak. Ynda sa katto katne u la riam ialade kum u nongkhrong, bad da kane ka riam u la ioh poi pat sha la ka jong ka ri.

Hamar kita ki sngi, ki Mogul ki dang ialethma bad uwei u syiem uba khelaiñ na Dekkan U Patsha, namar ba u la sheptieng ba u Sivaji un leit ialang lok bad uta u syiem, u la pyrshang bad pynsngewbha ia u da kaba ai nam syiem ia u. Nangta u Sivaji u la sdang ban pyrkhath kumno ban pynbha ia la ka hima. Ym shym la long uba la nang la stad ha ka jingshongskul, hynrei u la long uba proh jabieng.

U Sivaji um ju pynsyirwa ia la ka por ha ki kam leh tamasa. U long u Hindu uba skhem, bad u la pynkit shibun ki kam hima sima ha ki Brahman jong ka Maharashtra. U la pynmih ki aifi ban pynduh ia ka jingthok jingshukor. U la hiarthma ban lute ia ki hima kiba bun, bad wat ka ri Bengal ruh ka khynduh

hakhmat kine ki jinghiarthma jong u. Ki nongbud u Sivaji kim ju pynmong pynmynsaw ia ki nongrep, ne ia ki kynthai khynnah.

U Sivaji u la ñiew burom eh ia la ka kmie. Namar kine ki jinglong ba bha jong u, ki briew jong ka Maharashtra ki icit burom ia u haduh katta katta. U la seng ka hima kaba iar naduh ka Wahbah Narvada shaduh ki rud jong ka Wahbah Krishna. Dei tang namar u Sivaji la pynlong shitylli ia ki nong-Maharashtra kum kawei ka jaidbynriew. U Sivaji u la iap suk ha ka snem 1680.

Ki Jingkylli:

- 1. Kumno u Sivaji u la ioh ia kane ka kyrteng?*
- 2. Iathuhkhana lyngkot shaphang ki kam bashkur jong u Sivaji kum u nongialam shipai kiba la wanrah ka bor bad ka burom ia u.*

LYNNONG XXXIV

U KSEW BAD KI DKHIEW RIT
(I Khanatang na Ri Naga)

Ha kawei ka sngi Synrai uwei u ksew u leit mih bloit sha ka jaka u nongdie doh bad u la tuh shilyngkhot ka doh. Uta u ksew u la bam-sa-bam haduh ba u la shlei ka doh haduh ryndang hynri um man lah pynlut satia ia ka baroh. U la pyrshang ban iehnoh, hynrei kata ka doh ka la ibang katta katta ba um sngewnud iehnoh satia. Hangta u la pyrkhat, "Ban da nga don ar nierbah ngan klun ia ka baroh katba ka don, te ngan ym thngan shuh. Lada kawei ka nierbah kan thngan, kawei pat kan dang pynsah mynsiem hi ia nga," bad kumta u la peit jawdud biang ha ka doh

Shen shen u la iohi katto katne ki dkhiew kiba par ha ka doh. Bad kita te ki la long ki nonglum jingbam ba la phah da ka syiem ba khraw nam jong ki. U la khie joit da kaba bitar bad u la tim la tla ia kine ki 'khiewrit ha ban da biang u da ong, "iiv nongtuh! wat tuh ia ka doh jong nga; ia nga hi kata kam biang wat tang shimet ruh"; bad u la bam shuh, "ka nierbah jong nga ka donkam palat shuh ban ia kata iehnoh shisyndon, lymda kumta ngan ktha

shngiam ia phi baroh ” Nangta u dkhiew tymmen u la par sha ka shkor u ksew ioh u ksew un ym lah iohsngew, bad u la kyrpad ia u ban shah ia ki tang khyndiat u da ong, “Ñiuma ko rangbah, phi phi shu iohei, hynrei ngi pat ngi lah ban ioh da ka jingsbun jong phi. Shikyntien ha phi kan dap kan biang ia ka hima jong nga baroh kawei; shah ia ngi ban iaioh bynta lem tang shishyit.”

U ksew, namarkata, ynda u la pyrkhat jylliew u la tyrwa shibynta na kata ka doh Kumta ia uwei na ki nongrah khubor ba nep napdeng ki dkhiew la phah lam khubor sha ka syiem jong ki

Kum ban siew kylliang, ka syiem ruh ka la khot sngewbha ia uta u ksew sha ka shad ka kmen jong ki ryngkat bad ka khawai ka dawai. Ha ka sngi kaba bud haba ka khawai ka dawai ka dang shongshit bha u ksew u la wan mih sha ka jaka ka syiem dkhiew. Ka syiem dkhiew ka la tyrwa shisien bam doh ktung kum ka jingbam ba bha tam ba ka lah ban ai. Hynrei ka rit katta katta ba um lah ioh satia. La ong ba um lah satia ban sma wat tang hangno ba ka don.

Hamar kata ka por ka ksing ka dhah, ka shad ka kmen ka la wan poi sha khmat ka syiem. Hynrei namar ba u ksew u la sngewbitar ia la ka jingbysngewhun u la iuh bad kyrdem ia kata ka ksing ka dhah ia kaba la

pynlwet thiaw Kumta ka syiem ka la ieng joit na la ka khet syiem da ka mynsiem bitar bad ka la hukum ia ki shipai.

“Kynthah, kynthah, kynthah ha u ksew khlem da shah jem

Kynthah da ka bor bah, dei khawpud uba phet rem.

Tur sha ka jingialeh, thom da ka bor baroh

Leh la ka leh tynggeh, wat kheiñ ia ka doh ”

Kumta ki shipai dkhiew ki kynthah bor bah Ka syiem dkhiew ka long kaba nang ba stad, ba kumta ka ai hukum ha ki shipai ha ka rukom rwai phawar Bad da shisha, kaba iap na ka bynta ka kam paidbah ka kit ia ka burom syiem

Ha kata ka por ki nongiabam dkhiew baroh ki ialum ha ka lyngkhot doh ktung ba la ker tawiar da ki nongtalat kam Kata ka doh ktung ka long ka jingbam ia ki dkhiew baroh jong ka khawai dawai, kumta ba ki nongiabam ki dang ia ot ia kata ka lyngkhot doh lyngkhot lyngkhai ka ban iasam bynta. Ka long kaba heh katta katta, ba ka la i kat u lum bah ha khmat jong ki. Don kiba ong “Ade wow ka jingbam aiu

kaba kat kane ngi ioh mynta ka sngi!” Bad kiwei ki iaban ktien, “Em, em, lada ngi lah ban pynlut ia ka ha kane ka bam khawai dawai, ngan kylla kyrteng noh ” Bad ki la iarkhie iap-ang iap-ler (Lehse man u dkhiew u don mar la ka kyrteng)

Kumta kumta hi, hamar ba ki dang iarkhie pashait shar, u ksew u la iohi ia kata ka lyngkhot doh ktung, bad shisyndon u la klun hapoh shyntur, kumta ba baroh ki dkhiew kiba iadem halor ka doh ki la kynthah sni hapoh shyntur, kumta u la pang bad bitar Ki dkhiew ki la iakynthah ia u haduh pdot; sa ia ki nierbah bad ki snie.

U ksew u la lynñiar kliang bad u la kyrpad ia ka syiem ban hukum ia ki dkhiew ban sangeh noh kaba dait, bad baroh ki dkhiew na ka nierbah jong u ki la iamih ki da rvai ka jingrwai jop thma.

Khatduh khatwai, u ksew u la kular ban ym leh bakla shuh pyrshah ia ki dkhiew Kumta u ksew u la hap ban nguh hapoh ka jingsngewsynei ka syiem dkhiew.

Ki dkhiew rit ki don la ka kynhun ialang bad nalar kita ki don la ki niam ki rukom bad la ki hok ki riti ba la buh halor jong ki.

Ki Jingkylli

1 *Kummo ki dkhiew ki la loh bynta lem na kata ka doh jong u ksew?*

2 *Balei u ksew u la shah kynthah pat ha ki dkhiew hadien?*

3 *Kummo u ksew u la lait pat na kata ka jingshah kynthah ha ki dkhiew?*

LYNNONG XXXV

KA KTIEN KHASI — KI KTIEN KYNNOH

KI VERB

aiti-aijat	ibha-imat
aibam-aisa	shynroiñ-shynriap
pyniap-pynim	iathied-iadie
pynsuk-pynsaiñ	duh-tan
ainguh-aidem	trei-beng
iathuhkhana-iathuhkhadeh	aisut-ailor
pynduh-pynsep	bishni-bishnot
wad-thud	thiah peit-thiah ngor
iasneng-iakraw	iasam-iapied
pynsniew-pynsmeh	iakop-iasop

pynbha-pynmiat
 sngewthuh-sngewthaw
 khyrwait-khyrwing
 iabam-ia dih
 khroh-kjor
 saidthma-saidktien
 kren-khana
 pynshoi-pynshad
 minot-ador
 pynsum-pynsleh
 pynjem-pyntuid
 sad-khyllong
 mudui-phirat
 iajam-iakieh
 iarap-iabeh
 iathew-iawoh
 kyrshut-kyllan
 iasong-iatap
 byrngem-byrsit
 kynshew-kyndiap
 iabuit-iasap
 shong-sah
 iasuit-iatang
 siew-tda
 iakhalai-iabilai
 ialum-ialang

bampong-sapong
 mynsaw-mynsnam
 kñia-khriam
 shaniah-shakhien
 sheptieng-shepsmiej
 iakha-ialong
 ithuh-ithaw
 kyrpad-kyrpon
 pule-dangle
 riam-beit
 ialur-iapah
 bsa-pjah
 iadoh-iadait
 iashad-iakmen
 iarwai-iasiaw
 pyrkhat-pyrdaiñ
 kylli-pyrthew
 iashoh-iatat
 iamai-iania
 ryngkang-ryngkoh
 iarah-iarong
 iathoh-iatar
 iasmai-iaspot
 duwai-phirat
 shuh-per
 puh-daiñ

bamram-bamshah
 thngad-thngaw
 kynrum-kynram
 kynnoh-kynta
 ruma-rutit
 pynjuh-pynjem
 aibuiñ-aithiang
 sin-mgop
 mastieh-ryngkang
 kamai-kajih
 kawiat-sympat
 ianam-iaud
 kynpha-kynme

kyrkhu-kyrdoh
 mon-khusi
 sngewsih-sngewkynsha
 bynda-byndop
 iapduh-iaptan
 iarap-iariew
 salia-salaid
 ri-dup
 thawdur-thawdar
 iakhmih-ia-i
 iatim-iatla
 iaieit-iathoiñ

.....

LYNNONG XXXVI

KA KTIEN KHASI — KTIEN KYNNOH

KI ADJECTIVE

babieit-bathem
 longshuwa-manshuwa
 basmat-basting
 donburom-donsurom
 baphylla-baphyrsoi
 khlemraiñ-khlemsuiñ
 kylluid-kyrwar

balehraiñ-balehsuiñ
 bapahuh-bapahai
 bakhiah-banang
 kyllaiñ-kyrjaw
 bashait-baeh
 khyrwaiñ-khyrweh
 barem-bamuh

balorni-balorhap
 batngit-batngar
 bapyut-bapyar
 basuk-basaiñ
 bañiun-bañiep
 khapnap-khapbit
 balamwir-balamtham
 jaipdeh-jaisngi
 barim-bajah
 bajem-batuid
 badkhoh-badkhia
 bakhrew-bakhriap
 iwkhong-iwkhap
 hyndai-hynthai
 basniew-basmeh
 jyllumiñ-lymphuiñ
 donbor-donsor
 bakhyllah-bakhylliang
 badon-baem
 sohkhruh-sohkhram
 baduk-basuk
 dangkhie-dangsan
 bakyreit-bakysleit
 baioh-bakot
 bapang-bajhia
 jemnud-jemhin
 bamatlah-bamatpei

baiap-basap
 bakhraw-batri
 bajngai-barwang
 barit-baria
 kyrkieh-kyrdar
 batamti-batamjat
 sarong-sapei
 iwtung-iwsat ne iwkhap
 alhia-alput
 balyngkhuid-balyngbiang
 ingkhong-ingkhait
 bakloi-batna
 tipsuk-tipduk
 bathait-bajrem
 bariwbha-bariwmiat
 baraikhoh-baraidiaw
 balamler-balambait
 lutphut-lutsha
 mapik-adkhar
 babang-bashngiam
 bakthang-bajlah
 banang-bastad
 basian-batip
 tipduk-tipsuk
 bajew-basat
 thaba-thalep
 balalot-bakangar

bahok-basot
bajot-bapei

lamler-lamput
barnadan-barnadiah

.....

LYNNONG XXXVII

U BUDDHA

Ka don kawei ka jingiathuhkhana kaba s
ngewtynnad shaphang uwei u 'riewkhraw ka ri India
uba la im kumba 2000 snem mynshuwa Ka kyrteŋg
jong u ka long u Buddha

U dei na ka jait syiem Ka kyrteŋg u kpa jong u
ka long u Suddhodana bad ka kmie jong u pat ka
Maha Maya Debi U Suddhodana u la long u syiem
uba bha katta katta U la long uba riewblei bad uba
hok, u bym ju klet ia ki kam mane blei baroh kiba
dawa ia u ba u dei ban leh U la sngewsih katta katta
namar ba u la ioh tang ki kynthei suda U la duwai
jur ha ki blei jong u ban ai khun shynrang ia u. Ha
kaba khatduh u la ioh uwei u khun, bad u la kmen
shikatdei eh. U la jer kyrteŋg ia uta u khunlung u
Siddhartha. Kaba sngewsih ka long ba ka kmie une u
khunlung ka la iap haba u dang tang hynñiew
sngi ka rta.

Ynda une u khynnah u la dap katto katne snem ka rta, u kpa jong u u la buh ki nonghikai kiba nang ba stad bun rukom La hikai ia u ia ki jait jinghikai baroh ba la khmihlynti ba u khunsiem u dei ban nang. U Siddhartha u la pyni ia lade ba u long uba nep jabieng ha ka liang ka kot ka sla U la nang ban pyndonkam ia u sum bad ka waitlam, ban shongkulai bad shonghati ha ka rukom kaba stet bad ba phylla katta katta.

U Syiem Suddhodana u don kawei ka jingklusai na ka bynta la u khun, bad kata ka long namar ba u Siddhartha ym sngewhun satia ha kaei kaei ruh. La u la pynialang ia u bad ki parakhynnah bakhraw batri jong ka hima, kynthei bad shynrang, um leh juh satia. La u la buh ia u hapdeng ki nongrwai nongsiaw, ki nongput ki nongtem, hangto ruh i kumba ka jingmut jong u ka her shano tip, ym i iadei bad kiwei ki para khynnah. U kpa jong u u la pyrkhata ia ki lad baroh, u la pyndonkam ia ki buit baroh ban pynsuk bad pynsngewbha ia la u khun, hynrei daei daei ruh ym lah. U Siddhartha u kham sngewbha ban shong marwei bad iaidkai weibriew, khlem kwah iakren briew badno badno.

U syiem u la pyrkhata ba don tang kawei ka lad kaba lehse kan pynsngewbha bad pynhun ia ka jingkwah u khun jong u, kata ka long ban pynshongkurimia u.

U la phah wad khynnah samla kaba bit ba biang kylleng ka hima na ka bynta u Siddhartha Da kaba shitom ki la shem kawei ka khynnah samla Hadien ba la shem kumta, la mih kawei ka jingeh, bad kata ka long, u kpa kata ka khynnah u la pyneh ba un ym ai la ka khun ban pynshongkurim ha u Siddhartha U la ai ka daw pyrshah ia u khunsiem ba u long u bym don jingmad ia ki jingialang bad ki jingialehkai bad ki kam ialeh sngewbha.

Ban pyni ba u khun jong u u long uba bit eh; u syiem u la thaw kawei ka jingialehkai tamasa kaba khraw La khot sha kata ka jingialehkai ia ki sama kiba khlaiñ ba ba nang ha ki bun jait ki rukom ialeh ban iashim bynta. Da ka jingialeh khlaiñ bad ialeh stad ha kata ka shgi la shem ba u Siddhartha u la long uba tbit tam hapdeng ki nongbat waitlam bad nongbat ryntieh bad khnam. U la pyni ia lade uba stad ha kaba pynher kulai bad pynher hati ruh. U la long ruh u nongjingi um uba khlaiñ.

Shen shen hadien kane la pynbeit ia ka jingshongkurim u Siddhartha bad kata ka khynnah samla. Hynrei ka jingshongkurim jong u kam shym lah ban pynkylla ia ka jinglong kaba u ju long. Ki jingpyrkhat jong u ki dem sha kiel kiel kiba iadei bad ka jingsuk ka mynsiem, um don jingmad satia ia baroh ki jingsngewbha pyrthei.

Shisien ha kawei ka sngi, katba u dang iaidkai da ka kali lyngba ki surok shnong, u la iohi ia uwei u briew uba tymmen lob bniat uba itlot bad ikhrew harud surok, u bym lah iaid shuh khlem u shanduh .U kylli ha u kariwan jong u balei uta u briew u long kumta Ka jubab jong u ka long, “Baroh ki briew ynda ki la tymmen kin sa long kumto Haba dang shait dang khlaññi nga iaid nga ieng, nga mareh nga her, hynrei ynda tymmen ngin sa long kum uto u tymmen ” “Ia noh” la ong u Siddhartha, “nga ruh ngan sa kylla tymmen kum uto ha kawei ka sngi ”

Ha kawei ka sngi, u la lap ia uwei u briew ba u thiah harud lynti namar ba u la pang jur da ka khieshoh U i pisa kum ban sa dkhut mynsiem U Siddhartha u la kylli ha u lok jong u balei ba uta u briew u long kumta. La iathuh ia u ba dei namar ba u pang. Hangta u la pyrkhat khia eh ha lade, “Kata nga ruh nga lah ban kem pang? Balei ba donkam ban pang?” Kita ki jingpyrkhat ki la pynsynñia tiaw ia ka jingmut jong u.

Ha kawei pat ka sien, katba u dang iaidkai ha rudnong, u la iohi ia ki briew shibun ba ki iaiam bad ialynñiar, ki da bah ia ka metiap ha ka krong ban lèit thang. Haba u la peit ia kito ki briew kiba lynñiar kthang ba ki da thap la ki shadem bad patar la u ñiuhkhlich, u la ong ha lade, “Ani pleng! U briew u

long uba dap da ka sat bad ka shitom. Don ka jingtymmen! Don ka jingpang! Don ka jingiap! Da kumno u briew u lah ban lait na kine ki jingjynjar?" Ka jingim jong u ka dap tang da ki jingyprkhat kiba kum kine bad sngi bad miet.

Nangta shuh shuh, ha kawei ka por u la iohi ia uwei u pukir uba kup shiliang sem shiliang, u bym don mar mata ha ka pyrthei. Ka khmat jong u ka iphuh bad isuk kynjai. Ym don dak jingklusai satia ha ka main jong u. Haba u Siddhartha u la kylli ha la u lok, uta u briew u dei uei, la iathuh ia u ba u dei u pukir blei. U isuk mynsiem bad ijaijai ka khmat namar u la iehnoh lut ia ka pyrthei. Um don jingiadei shuh bad ei bad ei ruh. Ym ieit iano iano bad um isih iano iano. U la pynsuda lut ia lade ban pyrkhat tang shaphang U Blei.

Kine ki jingiohi ki la ktah jur ia ka jingmut jingpyrkhat une u khunsiem, haduh ba ha kawei ka sngi u la kut jingmut ban phet pukir noh na la iing. U kpa jong u, kumno-re-kumno u la tip shaphang kine ki jingpyrkhat jong u, bad namarkata u la buh ki nongap ha man ka jingkhong jong ka iingsiem, bad ha baroh ki khyrdop shnong

Ha ka por bym don ba khmihlynti mano mano mynmiet, u la mih na iing bad uwei u nongsynran

bajan eh jong u. Ym don ba tip maño mano ruh shaphang kata. Shwa ba un mih na iing u la leit khmih khatduh ia la ka tnga bad ia la u khun ba dang khunlung eh. Um kysiew ia ki na ba thiah, u sheptieng, namar u tip kin ym pyllait shuh ia u.

Ynda u la ia id jngai bah baroh shimiet, da u kulai, u la poi ha kawei ka jaka kaba kynjah. Hangta u la loit ia la ka jaiñspong bad la ki jaiñkup khunsiem jong u, ia la ki mawkordor ba u ju deng ha ka met, u la ai ia ki baroh ha uta u nongsynran U la sei ia ki waitlam napoh ka sop bad u la ot nog ia u 'ñiuhkhlieh. U la shim da ka riam pukir bad u la iakhlad noh bak bad uta u lok jong u.

Haba u syiem u la tip shaphang kane baroh ma u ryngkat bad ka iingsyiem baroh kawei ki la sngewsih ym lah ong shuh. Haba la phah wad ia u, u la poi shaduh lyndet ka hima u kpa jong u. La leit ban khroh ia u ba un wan phai pat shā la iing hynrei ym lah leh ei ei ruh

Kata ka hima sha kaba u. la leit shong ki khot ka Magadha. Haba ki briew ki la iohsngew snapnang jong u ki la iawan lum wan lang ban jngoh ia u. Wat u syiem kata ka hima, u la leit ban khroh ia u ba un leit shong noh ha iingsyiem hynrei ym treh satia. U la shong harud kawei ka wah, u da pynsāja sat ia la ka met ban wad ia ka jingsuk mynsiem. Um kham thiah bad

miet bad sngi, bad ka jingbam jong u ruh ka long tang khyndiat eh katba ia ai isnei ki briew ia u

Hadien katto katne por ba u la pynshitom sat ialade kumta u la shem ba kine kim lah pynmyntoi ia u U la sdang ban bam ban dih biang kum ki parabriew baroh, bad u la kylla eh kylla khlain pat. Nangta u la leit shong ha trai uwei u dieng uba ki khot ha ka tien dkhar u Dieng Bo, bad hangta la wan ka jingshai ha u. La plie kdar ia ka mynsiem bad ka jingmut jong u bad u la iohi ia ka lynti kaba shai da kaba u briew u lah ban shem ia ka jingsuk bad ka jinghun ha la ka jingim Haba shim kyllum ia kata ka jingkmien jong u, ka long, tang da ka jinglong jingim ba bha, u briew u lah ban suk.

Haba u la shem ja kane ka jingshai, u la mih sha ki shnong ki thaw ban pynphriang ia ka jinghikai jong u. Ki briew ki la pdiang ia u da kaba sngewkmen Naduh ki syiem, kiba khraw batri bad ki paidrit paidria baroh ki la sngewbha ban pdiang bad bud ia ki jinghikai jong u. Wat u kpa bad kiba ha iing ha sem jong u ki la kylla long ki nongbud jong u baroh.

Naduh kata ka por ba u la shem ia kata ka jingshai, ki briew kim khot shuh ia u, u Siddhartha hynrei ki khot Buddha, kaba mut "Uba ioh jingshai."

Ki Jingkylli:

1 (a) *Kaei ka kyrteng thymmai jong u Buddha?*

(b) *U dei u khun jongno?*

(k) *kaei ka jinglong jong u Buddha kaba la
pynsngewsih ia la u kpa?*

(d) *Anu u kpa jong u u la leh na ka hynia la u
khun?*

(e) *Iathuh lyngkot kumno u Buddha u la ioh ia
kane ka kyrteng ba thymmai bad kaei ka jingmit jong
ka?*

.....

LYNNONG XXXVIII

KA JINGIATREILANG

Haba ngi iohi ia ka sor bad ia kiei kiei kiba khraw bad kiba phylla ngi ju ong ha lade, "Ah ba nga ruh ngan da ioh ia kane bad ia katai, — ba nga ruh ngan da long kumne bad kumtai."

Ngan iathuh ia phi ba ym don kaei kaei ruh kaba khraw ha kane ka pyrtnei ba la jia bad ba la leh khlem da don ka jingia rei lang.

Ngj ju shait ong ia lade kum ki Khasi'ba ngim lah ban jakot ha kaei kaei ruh bad kiwei kiwei ki

jaidbynriew, bad ngi kloi eh ban kynnoh ia ka daw ha ka jingduk. Ka don ka daw shisha ha ka jingduk, hynrei don ruh ka daw balei ba ngi duk. Ka jinglong ki jaidbynriew kiba shai bad kiba stad ka long ban beh pynher krad sha jngai ia ka jingduk khnang ba kan wan ka jingdap kyrhai.

Ka atiar kaba bha tam bad kaba skhem tam ia kano kano ka jaidbynriew ban jop ia ka jingduk ka long da ka jingiatreilang. Ka jingduk ka long ka nongshun kaba khraw eh ia ngi ki briew. Namar ba ka long kaba khraw ngim lah ban jop ia ka khlem ka jingiatrei lang. Ha ki ri kiba shai kum ha America bad Russia ki nongrep kim ju shem shitom ban die ia la u khaw u kba ha ka dor kaba biang. Kumno ki leh? Ha kawei-pa-kawei ka dong jong ka ri ki don ki Seng Iatrei Lang. Baroh ki nongrep ki don la ka jong ka jong ka Seng, bad kine ki Seng Iatrei Lang ki ia sngewthuh jingmut kawei bad kawei pat. Uwei pa uwei u nongrep u leit ai ia la ka mar ha la ka Seng, bad ka pat kan pyniaid bad pyndie ha ka dor kaba thikna kaba iadei lang bad ka ri. Haba don uno uno u nongrep uba donkam tyngka kloi, ki ju ai lylliang ia u na ka Seng katba kum ka mar jong u. Ynda la die lut ia ka mar ki sa sam ia ki tyngka katba kum ka mar ba uwei-pa-uwei u la leit buh. Da kaba leh kumta ki nongthied kim lah

ban khniot iano iano. Lada jia ba ka mar ka sah, ka Sorkar hi ka iarap ban pyniaid ia ka shaduh bar la ka ri.

Ngan pyni nuksa mynta ia kawei ka shnong kaba ngin jer kyrteng ka Sohphlang Kane ka shnong ka don tang 100 iing, bad ka long tang phra mail na Sor Shillong Ki briew baroh kiba don ha kane ka shnong ki long ki nongrep. Ka jingrep kaba kongsan ka long ka kait. Ka dor ka kait ba ki die ha shnong ha ki nongkhaii ka long ar anna shinat bad ka dor ha Shillong ka long hynriew anna shinat. Shisien ong ngin ong, ia ki nongkhaii ba ki la leit lehbein ia ki nong-Sohphlang kiba pli. Hynrei kam dei kumta Ki nongkhaii ki dei ban iohnong shibun namar ki dei ban kheñ ia ka jingshitom ha kaba leit ba wan, kaba wad kaba lum, kaba kit kaba bah

Ki nongrep kiba pli kim banse ban die ha ka dor kaba tad namar ban leit die ha Shillong don ka jingshitom bad ki jingeh kiba kum kine.

Ban leit sha Shillong tang arnat ki kait ba la biang die yn lut shisngi, yn donkam ban ap ha iew baroh shisngi, bad lada ym lah die yn hap kit kylla biang sha shnong lan die ha ka dor kumba shu bret ei. Lada iwei i briew shi-ting kin ialeit sha iew ngi lah ban mutdur bunjaat ki jingshitom bad ki jingeh sngi. Ban ia kaba leit die sha iew la kham lah pynban ban

die noh ha shnong wat ha ka dor kaba tad katno katno ruh Ka jingmih ka long baroh ki briew ki la ngiah ban rep namar ba tad eh ka mar Namarkata, baroh shishnong ha Sohphlang ki briew ki ia kyndoi jakpoh

Kumno lah ban iarap ia kane ka shnong ba kin im kham bha? Da ka jingiatreilang lah ban leh shibun, kumne -

Ka Seng Iatrei Lang jong ka shnong kan lum ia ki mar ba mih na shnong ban leit pyndie sha Shillong Namar ba kawei kawei ka iing ka don mar mar khyndiat ka mar, la biang ban leit kit ia kata ka mar tang san ngut ki briew Ha ka jaka ban leit iew shispah ngut mynta tang sanngut ki leit bad khyndaiphewsan ngut ki ioh ban leit treï ban mih jingmyntoi Da kane ka shnong ka la myntoi Kawei pat, haba sanngut ki nongkit ba la dap kit ka mar ki poi sha Shillong ki nongthied ki la iaknieh namar ba ioh ia ka dor kaba khambha ban ia kaba leit die da ki shiphew ngut ki nongdie khutia kiba khmih tang kumno ban pyllait dor noh khnang ban wan phai kloi sha iing. Kane ka long ka rukom iaid ki iew ki hat


Da kane ka Jingiatrei Lang, hadien ba la siew ka bainong kaba biang ia ki nongtrei nongkatah, lah ban ioh myntoi ar bad lai shah ia kaba ioh haba treï tang na ka bynta shimet shimet.

Ia ki jait kam bad jait jingtrei baroh lah ban pyndei ha kajuha ka rukom. Ym lah ban trei ia ki kam kiba khraw, bad ym lah ban khmihlynti shibun ka jingmyntoi khlem ka jingiatreilang. Ka ri jong ngi ka donkam eh ban ioh shibun ka jinghikai shaphang ka jingiatrei lang. Ngi donkam shibun ki bried ban ialam ia ka ri ha kane ka liang, ban pynim thymmai ia la ka ri.

Ka Jingkylli:


1. Kiei ki jingmyntoi ba lah ban ioh ha ka jingiatreilang? lathuh lyngkot.

KABA KUT



CHICKED

State of Michigan
Library
51



Khasi Jaintia Presbyterian Press, Shillong
10,000 copies, 2001